


玉筍詩談 正續






叢書集成
初編

王雲五
主編

商務印書館發行



談詩笥玉
續正



著震盪朱

玉笥詩談

本館據學海類編
本排印初編各叢
書僅有此本

玉筍詩談卷上

明 新淦朱孟震乘器

先大夫在邑庠喜爲詩。與黎先生汝登雲交莫逆。黎有滄洲書屋。先大夫嘗就其中倡和。或去於九中。

從先大夫湖上飲。日元夕。乘月從滄洲來。適旅人張燈湖濱。因邀黎共飲。酒闌黎去。又邀之返。見一人醉從月下歌。黎喜甚。先大夫復取大白酌黎。因聯句曰。萬家簫管沸樓臺。想見金吾九禁開。清夜何人歌不寐。滄江有客去還來。燈幢掩映尊前動。春色分明月下迴。輸與山人得三昧。酒酣餘興更添杯。又咏老人燈云。白髮尙兒戲。身輕火煉成。形容雖潦倒。心孔卻虛明。前輩風流交契。可想見矣。

公道世閒惟白髮。貴人頭上不曾饒。此唐人詩也。先祖素齋府君挽周氏父子云。於今白髮無公道。不上周郎父子頭。蓋反其意而用之也。府君少豪俠好義。尤喜爲詩。惜散逸不存。余又嘗於敝歷中見和唐人無題四首。俱有致。後計偕往來數四。歸檢篋中。則已化爲烏有矣。止記一聯云。綺檻留雲迷薜荔。玉簫吹月隔芙蓉。此外有桑榆詞藁尙存。

武昌丞胡公考者。華亭人也。少有聲場屋。尤工詩。嘗學蘇文忠。因自號後坡居士。居官清約。喜與先大夫遊。閒命酒遊西山諸勝。酒中暢飲。酣然樂也。先大夫曾有詩云。人在西山更倚樓。無端風景上簾鉤。萬



083
1121
2:2586

松關近天低處。九曲亭當雲上頭。吳業只今何地著。楚山依舊帶江流。千巖萬壑鳴宵雨。洗我年來范老憂。公擊節賞曰。萬松關九曲亭。自有西山來。殆爲今日設。公有宮詞十首。嘗記一結句云。丁甯積翠池頭水。紅葉無題莫漫流。大有風人之致。一日先大夫呼予出。公面試以對曰。雨戰綠蕉驚鶴夢。余應曰。風敲斑竹亂鳩聲。因呼予爲小友。先大夫擢應天教。公握手歎曰。子期行矣。誰爲賞音。我自是束管絕弦矣。後某擢縣尹。致政歸。予家尙有公手書詩若干幅。

予師許石城先生。家金陵。以尙寶卿致政。家居二十年。遊情山水。文酒自娛。性喜客。客來命酒必醉。夜漏下五鼓不輟也。金陵當吳楚之會。每門生故人來訪先生。必留連信宿。諸官留都者。率以歲生日奉酒爲先生壽。先生輒賦詩張宴爲樂。予一夕詣先生。時王太僕在上元。先生折柬招與共飲。自日午洗酌。燒燈竟夕。仍起浮大白三。出門曙矣。嘗舉所爲詩笑謂余曰。平生愛我無如酒。凡事輸人不但基。先生之寄興遠而達矣。錢塘周銀臺興叔。工爲詩。最不易許可。每稱說先生詩曰。今稱詩者。僅得一二。輒自謂過人。若清新雋逸。雄渾古雅。無所不有。則石城之在白下。當稱大家矣。予領渝州。先生贈之詩云。久遊憲部蜚清譽。新拜名邦愜壯心。來往詞林聽夏玉。飛騰雲路羨橫金。節過巫峽才逾健。堂對岷江澤共深。從此登臺瞻漸遠。幾時重和白頭吟。又寄懷詩云。論文常下白雪司。別去俄驚二載餘。正指巫山看片月。忽從淮水得雙魚。甘霖此日隨熊軾。靈雀來年近隼旟。宦達有誰敦夙好。知君高誼古人如。銀臺詩尤奇脫。其送余赴渝州云。春陽已曠秣陵鶯。江渚東風趣上征。藝苑登壇誰竝駕。秋曹讞獄久稱

平三山對酒離襟感。百丈牽雲疊鼓鳴。舊舞巴渝沿猛銳。待君文教雅馴更。
張中丞有甫。銅梁人名在七子中。又稱三甫。予在金陵時。見俞氏所選盛明詩。又得新安所刻張中丞詩。
纔十之一耳。予爲渝州。公數以詩示予。幾百首。其所贈答予者。無論也。嘗欲萃而刻之。以渝尠能書。不
足配新安本耳。在南都。送予領渝州詩云。簡書朝下帝城春。此日分符得玉麟。自是使君稱長者。由來
岳牧用詞人。雙旌夜入刀州夢。五馬風清折阪塵。便欲西歸從父老。相攜簞食大江濱。夔門西望是江
城。太守乘春阜蓋行。蜀道那論難與易。雪山應繫重還輕。兒童萬室巴渝舞。簫鼓千峯竹馬迎。高第昔
稱朱北海。知君不讓異時名。寄懷二首云。秣陵亦是漢西京。詞賦君垂作者名。出領一州如斗大。來看
五馬似龍行。民間歌舞襄帷見。郡裏江山坐嘯清。多少青梧齋閣外。政成應有鳳凰鳴。乞將骸骨臥岷
峨。世事其如懶慢何。散髮林邱惜束帶。避人門巷或張羅。山川日待雙旌下。田野時聞五袴歌。說道使
君能下榻。肯容孺子一經過。明虹太守同諸寮。友。錢子澄清樓。偶作云。雉堞全扶閣勢平。雄看宛似石
頭城。奇峯曲抱青尊起。寒斗高懸畫棟明。中夜巴渝當日舞。東流江漢使君情。登樓無用思吾土。多少
風雲倚檻生。起家南行。舟次渝州。朱明虹公祖賦二詩贈別。和韻奉答云。歌發驪駒夾岸頻。臘殘愁見
柳條春。寒江月淡孤帆客。去國雲依白髮親。失計倉皇遠鹿豕。垂名未必畫麒麟。箚中尙擬陳情草。異
日將行上紫宸。天門一佩左符來。千里山河保障哉。滿地棠留巴子國。明堂人自豫章材。尊前意氣看
龍匣。江上風流憶鳳臺。不見潁川終拜相。期君中夜望三台。金陵江望。有懷明虹使君。時將入計矣云。

天垂西極望渝州。景物偏生萬里愁。江勢散從巴字水。鴻聲不盡秣陵秋。稍聞肆覲來羣后。遙想遮留夾去輶。試聽明堂傳劍履。幾人高第似君侯。明虹公祖行部山城喜而賦此云。衡門長夏足卑栖。忽報前茅業已西。不盡真人傳紫氣。頓教野老杖青藜。天垂露冕千峯出。雲拂旌旗落日低。小隊儻從雞黍約。草堂亦在浣花溪。明虹朱公招飲治平寺云。相攜春草徧禪堂。紺殿蓮燈綺席光。洞裏桃花歎酒色。風前寶樹散天香。情同塗嶺千重厚。心逐渝江兩派長。語到明朝車馬路。何人不擬醉爲鄉。遊塗山奉東明虹公祖云。青郊寒削萬芙蓉。支策捫蘿破紫茸。祠抱山川思夏后。春從天地入堯封。桃花水散龍門束。楊柳樓居雉堞重。君道案頭蒼翠色。何人持贈白雲峯。明虹太守餞余五福宮賦別云。登高遙借紫霞宮。福地追攀一逕通。城郭萬家春樹裏。江山雙目雨天中。雲穿仙樂憑闌得。露浥桃花照酒紅。指點關門楊柳色。誰歌三疊對東風。白市山行有懷明虹使君云。躡屣風氣佳。迴光照谷口。樵徑分羊腸。巖泉戩馬首。白雲非一態。煙嵐蔽林藪。上發青天歌。下若建瓴走。寺鐘穿峽來。松花落吾手。回瞻巴渝城。丹霞散培塿。埽石時一謳。顧戀區中友。山水疲雙眸。寄言永嘉守。朱秉器太守。擢河南憲副。送別十首云。使者乘輅入大梁。中臺列柏儼成行。寒風六月生沙海。玉壘高橫柱後霜。漢庭高第是渝州。五馬如龍陸海遊。明發江干攀臥處。也停軒蓋慰遮留。梁園百尺有高臺。嵩影河流相對開。一自鄒枚裁賦後。千秋又見使君來。天風一飽布帆過。繞樹流鶯兩岸多。峽口猿聲聽不盡。巴童又和竹枝歌。詞賦翩翻準二京。年來治郡見功名。請看漢使班生傳。文苑誰兼循吏聲。郡國婆娑棠樹枝。尊前折贈慰相思。

遠城無數江心石。留作他年墮淚碑。中原日月半樓臺。北去千峯立馬開。歌罷四愁聊寓目。粘天一片白雲來。驄馬平原此日行。繁臺秋色不勝情。黃河自是西來水。尺素無由達汴京。雄才馳騁氣如雲。愛士如從益部聞。明到夷門尋故事。何人不說信陵君。紫氣重封二室山。三花留待使君攀。懷人若縱西南目。天際蛾眉白雪閒。明虹公祖將之中州。遣書山中言別。適當七夕之辰也。因賦此見懷云。小結溪居竹萬竿。魚書忽報下江湍。開械已帶中嵩氣。倚杖遙從北斗看。點點千峯隨雁落。盈盈一水傍秋寒。莫將此日悲牛女。乍見人閒轉自難。明虹使君明發吾渝。不佞屬廬居不能往送。謹解佩劍贈別。而侑以詩云。乘驄使者將欲行。秋氣蕭蕭班馬鳴。紅樹江頭開祖帳。峯煙半落渝州城。伊予塊寢康成里。孔融惠好殊無比。關門遙憶攀轅人。恨不相隨諸邑子。涪白飛濤天怒摧。黎山九折車堪迴。渭城有曲不得奏。側身東望心悠哉。寥廓霜空暮雲紫。同心難隔千山水。蒨縵三尺平生親。脫贈相將贈行李。君不見吾家茂先佩干將。斗閒之色從豫章。君生豫章望氣否。神物會合終當有。明到中原曉渡河。帆前津鼓揚洪波。風雷倏忽劍歌起。始信龍泉尋太阿。嗟夫嘗鼎一臠公之所以主盟雅騷者。固可概見矣。

沔陽陳憲使蘇山先生柏參知公文燭玉叔父子俱以詩鳴興都。玉叔守淮安時。予爲南北部。結青溪社。玉叔以詩寄社中諸子。諸子爲江閣停雲詩贈之。而余爲之敘。余守渝。玉叔督四川學。相見歡甚。因折節爲交。時從郵筒中以詩文相示。先生有職方題藁。予爲序之。先大夫墨泉詩藁。則玉叔爲之序。蓋於是稱通家。先生亦復以詩文相贈答。先生才氣高一世。獨喜與文人遊。凡海內知名之士。爭願從先生。卽

數千里靡不意相結也。玉叔八九齡，卽能讀古文詞，已揮筆作驚人語。旣宦遊，所知交益廣，著作日富。其文不司馬詩不盛唐不屑也。先生所著有職方題葉，見南江閣詩文彙，借山亭詩葉，夏汭樂府，借山亭續葉。玉叔詩有廷中集，漢陰集，蜀中集，文有五岳山人文集，俱行於世。先生嘗寄余詩，有酬朱秉器使君用原韻云：錦字遙傳自錦官，詞源三峽倒生寒。才情豈但凌雲似，意氣還同折檻看。老去林閒悲短羽，往來天外望長翰。平生萬戶輕如洗，何意於今更識韓。答朱秉器太守云：錦字俄傳漢水涯，同心千里未云遐。雄詞已訝傾三峽，高誼還驚比二華。黃石敢忘曾進履，青門猶憶舊耘瓜。他時倘叶非熊卜，肯以勳名讓子牙。先生冢嗣文燮，諸孫汝堪，汝封，汝均，俱才而能詩。二難競爽，且駕長文而三。潁水德星，今移聚漢陰之上矣。

劉元倩，名成穆，其先世新淦人，以大姓商崇慶州，從外氏爲杜氏。大父性謹厚，不御酒肉，妖人鐸亂蜀之歲，夢吞五色石，三占之曰：石之言世也。五色備乎文矣。三世之後，其以文名乎。祖勤菴先生，舉宏治壬子鄉試，仕弗耀。父朝紳，以正德甲戌正月甲寅夜夢有鶴轟於庭，遂生元倩，名之曰成穆，別名以嘉壽。字曰文孫，志先夢也。元倩生七歲，能詩文，十歲博識，十五究經史百家，談元理，談兵，談世務，珠貫川絡，且澹然有山林之意。嘉靖辛卯，朝紳督餉江西，留元倩侍其母，柱史熊雲夢，宗憲張南溟，檄有司起試。試嘉禾賦經義各一，比成，日未中，讀之蔚然，因強入試院，以春秋舉鄉試第三，又強之試春官，不第，發憤卒。壬辰春三月二日也。先是己丑，元倩夢入五雲洞，二道士迎於門，以詩贈別，未有重龍望子回之

句。龍辰屬三辰月。甲辰之三月重龍也。人謂先兆云。升菴楊先生甚愛其過漢武陵詩云。歲暮霜殘過漢都。武皇陵墓舊荒蕪。不將玉匣藏天馬。猶使金燈照野狐。賦客詞園清露盡。仙翁丹竈白雲孤。千年惟有秋風曲。渭水長流啼野鳥。予愛其溫泉宮云。碧洞霜泉臥火龍。翠華宮冷玉芙蓉。遊人綠酒流春殿。妃子朱顏落夜峯。石閣獨逢明月醉。瑤塘虛有晚霞封。霓裳不見梨園曲。愁聽秦箏雜野蛩。元倩於詩文初不經意。卽席揮穎。有甚嘉者。若秋霖賦之類。俱散失不傳。所存集纔三之一。初名誠穆。南溟改誠爲成。易文孫以元倩。故集名元倩集云。

華州張明府維訓爲余言惠逸人事。余請傳之。傳詞多不具載。載其槩。惠逸人者。名沐。字子新。自謂一松子。東西南北人也。或曰上世惠妃族。以事謫秦中北里籍。乃爲秦人。逸人志氣軒豁。好古書。習名賢法帖。長安張太微與武功康太史。鄠杜王太史。盤屋王東谷。遊終南。見逸人詩有佳句。遂引與遊。逸人一日款有司。求籍長安太村里。按察孫公限韻令賦雪竹。逸人曰。請無拘禮法。乃解衣睥睨良久。揮筆題曰。誰人種此琅玕玉。引得清風俗尙淳。待月忽疑青鳳至。凌霄常與白雲親。渾如娥女漬殘粉。清似夷齊不受塵。獨有歲寒君子節。肯隨桃李競芳春。孫大稱賞。因爲繫籍長安。自是名益振。振起矣。康太史延之武功。作詩爲贈。然性至孝。秋夕忽聞促織。感而咏曰。我聞促織音。月下淚雙落。嗟我白頭親。寒衣著未著。康憐其意。贈予還里。後從雲總戎徵入爲幕客。乃遊皋蘭。歷雲中。又入承天平。入奇崛。不平之氣。閒寓於詞賦。晚又從總制劉公徵作固原志。尤好談黃白術。或詰其好仙者。逸人曰。子欲居九夷而

能以王道與九夷乎。子未知古達者之寓言也。而何以謂我哉。年六十卒。葬長安曲江。維訓與華原張子志川宗尉爲題明詩人惠一松墓。有一松集若干卷。

予鄉簡西岳和芳弱冠客遊滇南。題詩山寺。楊升菴先生一見異之。使人物色。遂定爲忘年交。凡先生出入必引與俱。先生藏書甚多。簡一覽輒記。每清夜劇談。他人不能答。簡一一應如響。在滇南倡和及評較文藝。惟簡爲多。張愈光諸人不及也。簡年幾六十。西歸蒙山。先生之詩云。金蘭意氣昔論文。宴坐朝霜竟夕醺。千里馳驅來熨道。十年羈旅共滇雲。交游落落晨星散。蹤跡悠悠逝水分。江南江北從此別。何時何地再逢君。因大慟不已。簡歸數年卒。其子謁先生瀘陽。時先生以疾臥牀。呼拜牀下。問西岳安否。其子曰。死矣。先生長吁數四。以袖拭淚。遂向壁臥。不復言。數日卒。先生交誼當求之千古矣。

張德南名煒。閩人。初爲南大理司務。署中有奇竹二。產檐下。已乃屈曲循檐出。德南援筆爲瑞竹賦。諸郎競傳咏之。又傳書諸郎。以便面從乞書者。屢滿戶外。詩喜爲平淡。一日。舍中芍藥盛開。乃命酒招余。飲取薔薇和麪煎之。佐酒極有致。又邀余從南城諸寺玩月。極歡而罷。以事誑。稍遷爲龍安推官。以歸。余爲渝州守。復會於蜀。寄予詩云。白下悲歌送我行。西風逐客淚沾纓。百年盟好耽風雅。萬里羈栖憶弟兄。蜀郡兒童迎使節。閩洲蝦菜計歸程。相看咫尺難相晤。山自青青鳥自鳴。

梁彥國順德人名柱。臣。爲大理評事。作詩一以古爲憲。有寶劍吟。贈予云。豫章有龍劍。紫氣干斗牛。至人識其精。豐城遂奇搜。感君重意氣。持贈結綢繆。啓匣已電發。磨礪忽星流。太乙曾下觀。封胡將見求。應

同樞具佩。持向漢庭遊。慙非張公子。靈貺焉可酬。

陳子野名芹。金陵人。爲長沙令。九十日解印歸。卜居鳳凰泉之左。又構別業新林浦。時垂綸其上。浦有橫厓。因自題曰橫厓小隱。又卽邀笛步爲閣。其上云邀笛閣。而引騷人倡咏爲樂。嘗取古高士自巢許而下迄於宋元。得七十餘人。人爲之詩。以自見其志。號思古吟。其喜諸君子入社詩云。邀笛亭前舍釣竿。丹楓林外候金鞍。吟邊綠酒今逾暖。花底幽盟久未寒。才子一時追鄴下。故人幾載隔雲端。諸君莫更輕離別。萍跡應憐此會難。咏美人走馬云。明妝驅駿足。晴日麗春風。各倚千金貴。齊驕三市中。踟躕疑舞鳳。恍忽似游龍。一盼揚鞭去。幽情已自通。窗中度落葉云。靜聽高林響。還過虛牖前。蕭條如帶雨。閃爍似含煙。孤影隨飛鳥。寒聲和晚蟬。妝臺有思婦。相對惜華年。鳳凰客所社會云。鳳凰泉上瑞煙輕。自煮新泉待友生。賴有香茶將一盃。殊無旨酒速諸兄。廣酬會意思投轄。湖海論交惜聚萍。莫以更闌問歸路。秦淮東畔月初明。秦淮煙月詩。淮水平如江水平。今人情似古人情。英雄滾滾隨波去。留得波開此月明。秦淮煙暝水長流。明月空懸萬古愁。春去秋來風景別。鳴箏不下酒家樓。折欄會和周銀臺云。新歲詩豪集。深更興未闌。共憐今夜月。仍似去年看。社主歡投轄。車徒怨折欄。彩梅紅對酒。忘卻外邊寒。鳳凰臺上憶吹簫云。有人春日發高臺。翩躚綵服從風來。忽舒玉指吹玉簫。花風千林天上飄。衆賓各進酒一瓢。竹音稍亭繼以肉。盡道鳳鳴在山麓。彩霞垂天日西沒。衆賓大斗飲不足。鳳兮鳳兮忽飛去。嘉爾靈禽在南國。長干曲云。長干女兒茜裙新。琵琶一曲驚千人。三吳少年豪傑士。醉待梅樹回陽

春。春風一夕朱英發。珊瑚枝頭掛明月。茜裙挽住五花驄。梅花落盡歡永歇。感別送朱比部云。使節三年野老家。鳳凰泉水自煎茶。今日西川成遠別。金尊空對碧桃花。離筵花雨亂紛紛。宛轉情言到夜分。巴峽聞猿應憶我。江樓望月正思君。聞笛有懷朱比部云。空林索寞雨絲絲。折得梅花未放枝。正是鄰家夜吹笛。倚闌無限故人思。虛堂夏日有懷朱重慶云。虛堂白日永。竹樹陰相錯。織羅無風吹。孀孀隔簾箔。乳雀巡檐來。翻階映紅藥。時有屋上雲。涼氣從空落。瞻雲思友生。竟日坐寂寞。蜀山修且阻。雙鯉何由託。

姚典客原白名淵。家金陵武定橋。以貲入爲郎。久之辭疾歸。性好吟。就所居構市隱園。水竹之勝。甲於白下。時時招詞人墨卿觴詠其內。醉取古墨玩之。時引筆作真草數幅。雅有致。晚好作梅。從閩王山人遊。盡得其妙。子之裔。爲郡博士弟子員。亦能詩。其邀笛閣喜諸君子入社云。青溪文酒已三秋。復喜羣公集水樓。藻思久傳鸚鵡賦。芳時今逐鳳凰遊。寒花照座金爲蕊。明月窺簾玉作鉤。夜靜忽聞三弄曲。依然江左舊風流。病後諸君子邀入社云。巖廊詞客擅風流。自喜漁樵得共遊。病裏愁心違授簡。秋來詩思一登樓。疏簾棐几山當座。楊柳芙蓉月滿洲。伏想年來題詠處。家家珠斗夜光浮。青溪對雨云。長空飛急雨。虛閣對滄洲。蕭索三秋盡。微茫十里收。絲飛桃葉渡。雲憶鳳凰樓。坐領寒江趣。煙蓑起釣舟。鬱鬱園中柳。云。園柳吐春姿。鬱鬱寒塘側。盈盈陌上條。日日送離別。玉筍掩深閨。金鞍遊上國。韶光日以暮。彫落良可惜。攀條欲寄之。不語淚沾臆。中情豈故殊。何嗟失顏色。離別勿復道。願言崇令德。喜諸君

分詠小園云。輞川庶和處。裴迪有新詩。豈意千年後。風流今在茲。買山成小隱。投轄得雄詞。今夜青溪上。文光照水湄。冬夜程孟孺莫雲卿姚光虞過集云。坐深銀箭燭花開。荒徑能勞二仲來。書變鼎彝傳古法。吟餘風雅盡詩才。談生塵尾將迴雪。暖盎枝頭欲放梅。更喜吾宗同笑詠。草堂今夕聚三台。賦得白鷺洲送黃參軍奏績云。岷山遠發大江流。采石東連白鷺洲。一片蒹葭搖雪浪。三山臺殿枕丹邱。地邀彩筆增新色。人對離尊起別愁。羨爾雲帆天路近。春風吹到鳳凰樓。冶城餞吳莫魏張四才子云。冶麓高寒結駟來。旗亭卮酒傍丹臺。黃金舊鑄雙龍劍。白雪新傳四傑才。天半月明瑤鶴下。林閒星聚石壇開。送君翻念青溪社。醉倚離筵不放杯。

華明伯名復初。無錫人。父補菴先生雪。爲比部郎。博雅好古。家藏書甚富。明伯少有才名。克嗣其家學。取藏書一一校讎之。又喜爲詩。與盛仲交相友善。隆慶癸酉。以貢授應天學訓導。仲交尙爲弟子員。雅相師友。意各自得也。從所寓構秉燭軒延客。客至輒舉白賦詩爲樂。軒中雨集得四言云。有客容膝。亦孔之安。載集佳賓。佩玉珊珊。佳賓至止。德容幾幾。四座講德。周道孔邇。湛湛我池。鑑爾令儀。君子攸萃。燕笑孔宜。酌我洞泉。淪我山茗。客醉而歌。亦旣酩酊。陽旣伏止。澤藏乃宜。迅雷風烈。慨焉非時。賓旣醉矣。雨亦滂矣。夜如何其。夜未央矣。雪中借馬云。踏凍非無東郭履。沾花空有杜陵詩。錦鞵不惜晚來借。紫叱何妨醉後騎。自是看山揮策緩。非因傍險得歸遲。長安陌上多遊冶。不似灞橋風雪時。美人走馬云。豔質輕千里。翩然自出羣。乍聞乘月駟。驚見逐鸞輪。飛鞚驕纒逞。綦鞭捷有神。霓裳同躑躅。霞帶共繽紛。

紛來似花成陣。迴看雪滿身。鬢拋驚欲墜。襪躡不生塵。柳漾垂青組。桃飛蹙錦茵。波涵秋欲轉。峯斂翠猶絜。猿掛巫山夜。珠浮洛浦津。星流行更穩。電掣態逾新。彷彿雲中見。飄飄認未真。市隱園冬日云。殘冬景倍暄。欵似入冬候。山家酒初熟。鷗盟復如舊。水底見鍾峯。窗閒列遐岫。何須絲竹響。但喜花木秀。日暮邊池行。清風滿懷袖。鵝羣閣觀水。邊芙蓉云。昔曾詠秋水。又見秋深時。芙蓉故繞徑。菊英尙滿籬。有花不來賞。時過復惜之。紛紛塵中人。擾擾將何爲。徒倚不忍別。殷勤銜玉卮。今日良宴會云。今日良宴會。射堂何鬱盤。勝友畢來集。寶樹棲鸕鷀。揮筆飛雲烟。字字青琅玕。人生貴適志。和音良獨難。主賓旣款洽。藹藹如金蘭。聚散慨落葉。誰能念歲寒。姚原白病後入社云。芙蓉夢隔三秋月。黃菊歡同此夜尊。幾度鳳凰臺上望。閱江樓畔荻花村。送朱比部守重慶云。巴江曲曲萬載流。提封百里古諸侯。江流晝夜自不息。何人遺愛傳千秋。曾聞宋季余安撫。闕館招賢資幕府。聚米爲山衍陣圖。二冉奇謀爲誰吐。釣魚山下江之衝。移堡依山設險重。救寧拊輯稱良牧。至今猶羨中興功。使君光價重璠璣。玉筍山中曾著書。一麾出守青雲色。焚道新乘五馬車。只今有道成沃壤。桑土應須計安攘。巴渝千里起淳風。重爲余公拂遺像。

盛貢士金陵人。名時泰。字仲交。爲社中詩。援筆立就。已輒失其藁。其立春後一日。同莫雲卿蔡世卿訪朱比部。用韋左司韻云。梅花柏葉彩華新。官舍蕭蕭竹樹鄰。露墮經時虹氣健。雲筒隔歲馬蹄頻。久甘鴻迹爲樵客。不媿鳩司作從臣。最是江南明月夜。共將花柳詠初春。送朱比部云。幾年官寄白雲司。日日

行吟湖水涓。五馬西川來作守。一尊南郭暫相持。天邊雲樹依臺遠。雪後春濤出峽遲。自昔蜀中多勝蹟。品題應是待新詩。同友晚遊方山云。千山迴合日將曛。一片鐘聲下白雲。茅嶺葉飛寒色早。秦淮水落暮煙分。風含石竇疑泉響。月朗巖扉過鹿羣。卻憶向時曾載酒。桃花細雨共氤氳。曉登雞鳴山塔院。望後湖殘雪云。夕陽斂湖光。殘雪散山麓。鐘聲飄寒空。人家隱深竹。一鳥下高天。迴翔向叢木。老僧澹無言。相看幽意足。黃以藩過訪云。竹下論詩寒色生。蕭蕭僧舍夕陽明。湖光若是山陰道。雪片應飛白下城。酒琖暫依梅樹坐。琴囊何惜薜痕行。高天欲晚還留句。何愧任翻半字情。寄陳仲魚云。臺上重開碣石宮。海鵬南徙趁長風。青雲原是天邊客。白馬羞爲歷下雄。溪叟不妨漁艇在。洞仙應許鶴書通。海陽春色知能早。何處桃花開最紅。同莫山人過市隱園云。向夕風吹池水平。高天雲淨雨初晴。朱闌隔岸魚俱躍。蒼玉當軒筍亂橫。作客不堪憑遠眺。吟詩一爲寫閒情。醉來坐愛松林好。共向涼臺待月生。寄費參軍云。青溪流水遶長堤。別後懷人芳草萋。同社不堪重載酒。逢人空憶舊畱題。宦情落莫悲蓬鬢。世路參差共馬蹄。不信君才原出衆。可容長日在途泥。和許太常秋日書懷云。淮浦新潮映月流。秣陵曉色又驚秋。庭除共喜生三樹。鄰里何勞羨五侯。疏廣自知金玉賤。山濤不爲簡書留。年來贏得身強健。卻笑虞卿枉解愁。池塘坐見一螢流。遂有梧桐爲報秋。柘境近知新拓地。醉鄉曾許舊封侯。不妨出郭青藜伴。最喜尋僧白社留。潘岳近來多閣筆。悔將詞藻賦閒愁。

周山人才甫。字文美。永嘉人。嘉靖中以詩鳴。所著有鴈川集。隆慶辛未遊青溪社。所爲詩具載社彙中。家

故貧。客游江湖。以文酒自適。喜作梅。每對客酒。開命筆。殊可人意。又自爲詩其上。詩才亦秀逸。南都士大夫能詩者。皆樂與之遊。余去金陵。文美從方子及結社。以詩寄余。渝州。其同方計部集安茂卿寓閣云。層閣倚鐘山。芳筵得勝攀。乾坤容我醉。日月向誰閒。粵客驚狂態。吳歛索笑顏。相忘軒冕貴。白眼浩歌還。李比部方計部載酒齊王孫。園亭見訪云。竝馬名園裏。攜尊就隱淪。已憐金作谷。況倚玉爲人。白髮狂何劇。青山懶是真。詞名歸二子。誰不仰清塵。新正六日。同丁周方三計部集王元德大夫宅云。背郭堂初敞。開尊聚酒星。歲新頭漸白。人舊眼俱青。山水存高調。風塵笑獨醒。若非憐意氣。何以慰沈冥。送王按察四川云。憲府開西極。分符重地曹。帆前春樹遠。天上法星高。旌旆懸三峽。圖形按六韜。君才堪賦蜀。萬象待揮毫。迢遞巴山路。千盤鳥道懸。馬前浮曉日。雲裏響春鶻。交態慙余拙。疏狂藉爾憐。不能隨去旆。夢飛到西川。雪中方子及席上閱康山人詩。傾尊飛雪滿江津。披對瑤華憶故人。身寄黃金臺上月。歌翻玉樹郢中春。獨醒天地堪容傲。高臥烟霞不受塵。客久星霜凋短鬢。何如回首共垂綸。費左軍民益懋謙少保費文通公子也。家世爲鉛山人。自文憲公以龍首當揆。文通繼起。鉛山之費。遂爲西江甲族。民益以貴公子。願折節下帷。讀古人書。性又喜吟。以蔭入爲御史臺都事。鄉人楊懋功。以祠部郢中陳玉叔大理。時俱以詩名燕山。民益閒就爲社會。已爲南左樞參軍。青溪之社。民益實首倡之。又從樞府第構籌筆軒。客星槎。淪茗焚香。山人墨客。延接無虛日。閩有王山人者。善寫梅。民益卽從作梅。金陵陳子野善墨竹。民益卽從作墨竹。晉江黃孔昭工山水。民益卽爲山水。皆得其意。余領渝州民

益復招余籌筆軒。長洲周秀才懋修。雅士也。適同盛仲交來。因共卽席賦詩贈余。周詩云。五馬雙旌滿路輝。郎官出刺兩川湄。才同何遜離京日。望重文翁化蜀時。閣道使星臨錦里。岷江卿月映峨眉。詞情到處堪畱社。樞管梅花遲所思。民益云。追隨白社六年餘。羨爾新詩獨起予。遠指雙旌臨錦水。先驅五馬向匡廬。江梅試暖離觴劇。苑柳迎人執袂初。重握春風更何許。涪江魚鴈莫教疏。又從江閣以停雲詩一冊訊予渝州。民益詩云。玉麟西綰憶當年。龍劍公攜思黯然。雲自褰帷高北極。春從露冕下東川。花開曾醉新豐酒。江上猶歌郢雪篇。聞道蠶叢多勝槩。新詩應向故人傳。

李襲美。一字于美。廕南陽內鄉人。所著有李陽穀詩。吏隱軒詩話。所贈予詩。已見他集。其得朱憲使潼關詩云。書傳遠道動經旬。讀罷依然字色新。今日鍾情還我輩。向來詛嶽是何人。露零仙掌甯滋渴。峯削蓮花不染塵。莫使山靈成悵惘。好憑吟筆鬪嶙峋。送呂山人中甫歸四明云。羨爾昂藏七尺身。簪冠芒屨遠風塵。只疑黃鶴樓前客。不作非熊夢裏人。把臂且酣燕市酒。擎舟猶及甬江春。刀名錐利成何事。樽散偏宜鬢髮新。春日同何啓圖啓範二太史集。李子禹宅云。馳思無勞入杳冥。問奇同過子雲亭。春歸芳樹禽相媚。客有霏談塵詎停。雙鬢漸于鬢旅白。一尊還對假山青。明時雅會非容易。太使何當奏德星。元夕後二日。周民部見過云。帝鄉何幸共彈冠。咫尺翻令見面難。芳醕喜同今夕飲。花燈猶作上元看。雅談頓使塵襟靜。春色平分朔氣寒。正是主恩休沐日。不妨傾倒盡餘歡。鄭伯良席上同華存叔馬遜之作八音體得如字云。金門無復待公車。石戶爲農樂自如。絲肉漫娛高士耳。竹松長護故山廬。

匏尊綠酒能供醉。土鼓聲高可佐鋤。革履紵袍人不識。木公東望有來書。送黎祕書歸嶺南云。乞歸豈是厭承明。欲向山中采杜蘅。興在孤雲多喜色。圖開五岳見真形。將因仙驥招王子。詎借姬雛壽伏生。別後漫愁鴻鴈少。梅花消息遠含情。夏日集吏隱軒得風字云。吏隱開軒爽氣通。晚來花竹媚籬櫺。羽衣遞舞中天月。塵尾頻揮四座風。歌似接輿狂不減。飲從擊筑氣還雄。主賓未醉甯分手。況復天涯四美同。松泉寺看芍藥云。牡丹零落已無春。芍藥猶堪發興新。雅到未須論伯仲。花奇真見有君臣。離離影市黃金地。冉冉香浮白氎巾。空處不勞稱色相。任教吹作路旁塵。是日大風

任山甫字夢榛。休甯人也。而寓於杭。初冒曹氏姓。後復姓任。因自稱任公子。歛有五安山。又自稱五安山人。山甫於社中齡甚少。然意度才藻。逾於老成。初入金陵。從惠山金山攜二泉至。余候之。山甫出虎邱茗。淪二泉試之。金山泉味頗重。覺惠山稍勝。昔人評中冷第一。恐非今水也。予爲賦四絕句。山甫遊冶城。過盛仲交蒼潤軒。有攜雙鶴至者。山甫納之署中。仲交與予爲聘鶴賦。一日鶴飛去。半月還。魏季朗張仲立又爲賦還鶴。山甫雅好事。爲一冊屬縉紳歌詠之。遂爲白下勝事。性又好古篆籀。所藏斯邈名跡及古彝鼎款識文甚富。又能以古篆作宏記。文奇而刀法精絕。諸名家不及也。出爲興都參軍。以才著。城孝昌署當陽。俱有成績。然居興都時。每快快不樂。在當陽觀玉泉山鶴有感。賦詩云。豈戀乘軒寵。深懷別主情。雲泥一相失。雞鶩不堪爭。乍夢傳書舞。時聞振錫鳴。試令生八翼。可但返遼城。民益量移德安。邂逅武陵。因各賦詩數章。民益云。武陵川上路。旅館忽逢君。白下三秋夢。滇南萬里雲。朔鴻來浦

激霜葉映寒。曠祇恐明朝別。相期坐夜分。山甫云。我昔出白門。黯然欲銷魂。思君隔楚水。脈脈不得言。我今辭異域。夜夜聽啼猿。迢遞萬里餘。相思無晨昏。因君能縮地。忽漫逢仙源。一爲具雞黍。所欽古道存。伊人洵芳潔。佩服蘭與蓀。孰知匣中刀。不別讎與恩。世路良悠悠。請君勿復論。雨中同民益。話舊云。江城樓閣暮。雲低遷客登。臨手重攜。楚國大風仍颯颯。秦時芳草已萋萋。停杯似索黃花笑。擊節還驚白鳥啼。當日誤傳流水曲。妬人春色是青溪。民益和云。白門送爾思依依。回首風塵事已非。郢曲陽春知寡和。吳鉤寒色看雄飛。孤亭載酒江城晚。一榻談天夜雨微。意氣如君復能幾。肯令琴劍滯征騑。與山甫登武陵驛樓云。高樓時聘望。樓下武陵溪。細雨山容失。繁霜草色萋。帆流江漢遠。杯逐野雲低。何處尋幽境。仙源路不迷。山甫和云。擁傳楚江隈。登樓作賦才。城頭飛雨暗。殿角曉鐘催。客路仙源杳。漁舟極浦迴。凭闌話羈思。芳信托寒梅。送民益轉連浙東云。臨歧日未曛。落葉感離羣。望越山猶隔。浮湘路又分。關門多紫氣。袍裏滿青雲。倘到蘭亭下。風流見右軍。民益送山甫充貢使入燕云。使節度遙岑。迢迢歲月深。豪吟多白雪。入貢有黃金。滇水春風遠。燕關劍氣深。蒼生思舊澤。莫動故園心。臥病懷歸云。伏枕仍羈思。那堪夜雨聲。天涯琴鶴侶。歲晏薜蘿情。家遠書難到。衾寒夢不成。何時理舟楫。望入豫章城。孤劍停山館。秋深此一過。愁隨羈旅盡。淚向逐臣多。渺渺鄉園路。悠悠漢水波。倚閭人望久。惆悵白雲阿。山甫和云。楚客原同病。羈人共漢津。孤燈懸雨雪。雙劍老風塵。旣與朋儕好。還憐骨肉親。寒宵不能寐。相對淚沾巾。萬里事行役。經年往復還。多愁生白髮。一病改朱顏。不厭沽新釀。遺思反舊山。因

君歎畱滯。窗外雨潺潺。噫。二子之志見矣。山甫社中詩。攜去興都。僅記雪中借馬云。裘馬千金輕借客。少年倚馬復裁詩。卽尋賣酒罇邊去。更向看花陌上騎。桃葉雲寒垂勒晚。鳳泉風急促鞭遲。天閑此日多神駿。曾是諸君得意時。送朱比部云。使君五馬向西川。千樹桃花恨別筵。飛夢卽隨梁月遠。愁心還共署雲懸。銜杯白眼知何日。染翰青蓮亦有年。書記本來耽著述。因將高倡郢中傳。山甫後遷雲南倅。余入汴。復握手西陵。天涯知舊。忽漫相逢。蓋不勝慨矣。

玉筍詩談卷下

莫廷韓。初名是龍。字雲卿。後以字行。華亭人。以貢入北太學。父中江先生。嘉隆閒以詩名。爲廣西藩伯。廷韓尤有雋才。書畫琴弈。投壺射藝。歌曲戲劇。無不精絕。癸酉以諸生應督學召。校書南都。時與吳瑞穀。魏季朗。張仲立。邵長孺。從青溪社中爲詩會。社有邀笛閣。乃陳大令所構。初入社諸君。各分韻賦詩。廷韓得孤字云。小閣邀懽興不孤。錦屏畫燭照清娛。漫投白社攜詩草。共許青山臥酒壺。風笛蕭蕭催落木。烟楞漠漠暗平蕪。倦遊廿載無知己。拂拭今將慰旅途。是日雪。余以馬載長孺還。長孺會中作雪中載馬詩。華明伯因舉美人走馬詩有云。似驕還似怯。憐駿復憐神。廷韓因令和長孺詩。而又以美人二句令各成一詩。詩成乃罷。次日復集賦青溪對雨及窗中度落葉詩。次集姚原白市隱園。共賦鬱鬱園中柳及分賦鶴逕鷗波秋影亭鵝羣秋水諸詩。次集陳子野環碧樓。共賦相逢行及環碧樓嬾真山房詩。次集射堂。賦今日良宴會。次集高座寺雨花臺。賦雨花臺城南晚眺諸詩。次集朝天宮白鶴樓。賦塞下曲。次集普德寺。各爲別詩而罷。廷韓旣以貢入太學。又從都下遊。一時名動公卿閒。乃走書約予丁丑爲十日飲。已下第歸。余乃入都門。不及晤。蓋矯矯雲閒之龍也。雪中借馬云。蹀躞爭憐駿骨奇。灞橋衝雪漫裁詩。還將范叔綈袍意。分得郎官廐馬騎。色借五花驄影亂。寒搖匹練客心遲。莫言東郭先生

賤不是長安曳履時。美人走馬云何處。青樓俠來馳紫陌。塵似驕仍似怯。憐駿復憐神。顧影裝全墮。停鞭態轉新。稍遲應索伴。每避爲逢人。結就花爲陣。翻來燕是身。飛揚雲外色。撩亂苑邊春。夾道風流眼。爭看恐未真。窗中度落葉云。綺疏臨野渡。秋樹響前林。颯颯合風入。紛紛逗雨深。拂來紅袖掩。積處綠塵侵。誰送哀蟬曲。無端攪客心。獨樹蕭蕭下。邊淮正可憐。悞投齋閣裏。不似御溝前。灑戶驚秋夢。翻經助夜禪。江潭悽側處。但莫問長年。鬱鬱園中柳云。聊暇陟中園。差可遊子矚。當春赴和節。簷柳報新綠。繁陰憑林起。浩霧澄空沐。曖曖清池幽。冉冉平臺曲。玲瓏起朱扇。阿那迴丹轂。移根建章道。拂絮雲陽谷。宛彼黃鳥言。流音戾華屋。華屋栖佳人。欣至歎別促。况乃及衰暮。怒焉感情育。鶴逕云一徑。掩雙扉。蒼雲墮烏衣。欲巢珠樹徧。閒點翠苔稀。霧薄秋陰淨。霜空夜色微。共憐霄漢意。猶此傍人飛。懶真山房云。嬾慢非緣傲。天真亦自宜。青山欹枕慣。白日放關遲。坐有烟霞主。人疑土木姿。從來嵇叔夜。禮法未能羈。相逢行云。吾黨本自東西人。闊絕萬里歧。形神忽然邂逅。漫相值。意氣乃若平生親。我時落魄長安道。貂裘無色蘇卿老。白眼茫茫視何物。先生歸乎苦不早。長安自昔稱豪華。結駟擁蓋爲高奢。羈旅何心謝聲勢。不才差可沈泥沙。鄉歌無端涕橫下。調將彌高和彌寡。偶因世道值熙明。耿耿心期共風雅。石頭城邊霜氣寒。桃葉渡口淮河乾。窈窕長堤啓朱閣。紛紜五色披琅玕。余乃東吳漫遊客。誰其傾心借溫澤。昔聞先達恥彈冠。今有諸君下縫掖。世態悠悠難可論。素交寂寞無雷陳。烈士由來重然諾。片語相復輕千鈞。君不見侯生睥睨待公子。北面刎頸斯何人。又不見荆卿感恩易水上。持利匕首西

入秦。丈夫突兀固如此。安能俛首溝中死。雄飛雌伏命所使。諸君麒麟我鹿豕。萬事昨舌我不鳴。爾時但倡相逢行。狂來叫嘯一起舞。芙蓉夜吼珊瑚驚。才俊縱橫坐夜發。三峽詞源流不歇。飛霞片片盡可餐。瑤草枝枝盡堪搗。潤色真成昭代觀。風流已駕前朝轍。海內文章稱阿誰。吾黨崛起何矜奇。俯仰一世未肯下。得失千載誰當知。嗟嗟空名稍可緩。河清難期髮白短。只今且盡壚前歎。歸去山中雪應滿。塞下曲高常侍韻云。孤戍十年心。材官舊羽林。愁迷青塞闊。夢遶玉閨深。匣劍發雄氣。邊笳和朔音。陰山無過鴈。一字抵南金。立春日普德寺畱別云。山寺一尊酒。其如欲別何。交逢青眼舊。坐入翠微多。芳草春邊路。雲帆天際波。從今遠公社。寥落幾人過。立春後一日。與盛仲交蔡世卿同過朱比部。用韋左司韻云。帝里風光入望新。天涯時喜得比鄰。似憐薄命才情減。可奈浮生歲序頻。南郭栖遲歸大隱。西曹閒散屬詞臣。長安裘馬凋行色。又見爲花及早春。餘不悉載。

魏季朗名學禮。長洲人。以貢入太學。初與劉侍御子威遊。結社相倡和。有比玉集。後又與黃太學孔章遊。刻采蓉辭。崑山連壁。蘭澤同心。王中丞謂滔滔洪藻。名下固無虛士矣。青溪癸酉之會。季朗作下第入邀笛閣詩云。漂泊猶存原憲風。不將名墮五陵中。梅花吹落思桓子。蓮社邀來異遠公。古渡霜寒流水在。石城秋盡暮烟空。蕭條莫問招賢事。回首荆山泣未窮。又邀笛閣云。王令風流尙可攀。何人清弄水雲閒。月明朱雀音疑吐。梅落長干人未還。憑檻成懷生折柳。倚牀別思在關山。桓生千載如公等。暮雨蒼茫苦竹閒。雪中借馬云。衝冷漫成婢裏歎。據鞍仍奉郢中詩。寒生梁苑憑誰賦。名傍燕臺借爾騎。數

里豈煩千里捷。五花應爲六花遲。黃金結束曾無惜。尤勝昭王下士時。鬱鬱園中柳云。園柳何芳菲。垂條蔭新陌。朝華露未晞。春陽益鮮澤。攀條寄所思。所思在遠道。別離傷春心。歲月忽已老。河漢多秋蘭。原上多芳草。故園日蕭條。歡會苦不早。思君不能寐。顏色凋美好。塞下曲云。寒風驚客心。飛雪滿長林。漢月臨關黑。胡沙積塞深。征鴻辭戍角。邊馬識笳音。但使匈奴滅。無勞捧賜金。別朱比部云。曉霜鐘鼓動嚴城。秋署爲郎薄。送迎元武北。看雙劍在大。江西掛片虹。明梁園後至。能傾座。燕市高歌不爲名。綠綺欲須鍾子聽。夜來空作別離聲。予丁丑入覲。季朗寓王宮詹館中。爲予評郁木葉。予西還。贈詩云。巴江劍閣似秦關。計吏初辭玉殿班。腰下雙龍看紫氣。斗邊五馬度青山。蠶叢舊國微茫外。鳥道丹梯杳靄閒。賦就新詩堪照乘。漫誇合浦夜珠還。後授某學博士云。

吳瑞穀字子玉。新安人。博學。尤工古文詞。有吳子玉集四冊。詩亦典實。然構思良苦。其入社詩云。銀燭金杯向夜清。初冬風日似春城。帝鄉古渡粉榆社。官舍新歡薜荔清。笛弄潛漪雲外度。劍開鏽澀斗邊明。遨遊上國延州事。欲聽簫韶入座音。雪中借馬云。白下久聞歌白雪。不妨雪裏過論詩。雲司肯借三花駿。柳外還教十里騎。剪拂憐才心獨許。驕嘶銜意步應遲。馮驩不用悲長鋏。青眼孫陽一顧時。美人走馬云。遊睇過金罇。方瞳起紫塵。迴花變弄影。入柳一傷神。試體疑矜寵。嘶馳欲帶鞶。裾翻纓絡急。裙閃障泥新。輕似臨風迅。驕還顧步頻。金羈搖劍穩。朱汗透蘭紉。飄去香垂手。散來雲滿身。未須看步襪。陌上徧生塵。窗中度落葉云。綺疏秋色暮。萬壑樹悲鳴。飄戶風將入。穿樞雨送聲。乍飛寒鳥亂。遙度片雲

輕不次題詩句。那堪寄遠情。市隱園海月樓云。丈人貪得月。海上結樓居。素暈浮仙島。金波滂綺疏。光生滄渤裏。氣溢影娥餘。更有明珠在。清輝夜自如。相逢行云。廿載冥心汗漫遊。一望暝色迷滄州。歸墟直探驚陽侯。風雨黑夜生窮愁。持向人閒何所投。清輝夜夜照培塿。崇臺聚處已成邱。幾迴渙散無人收。我心自咤還自休。鏡中白髮詎甯羞。北望長天慘敵裘。人前不慣歌崩絳。青溪勝地標風流。相逢一笑大白浮。飛詞純藻期千秋。論交一片心綢繆。惜無厚風借前籌。開懷已許青雙眸。咨嗟漫歎千古上。且盡尊前瓦甃甌。懶真山房云。陶令真成懶。悠然三徑餘。意隨簷鳥倦。心共幔雲舒。棊几惟元草。匡牀有逸書。勞勞亭上客。那似臥精廬。贈比部朱大夫云。公車待問蜚名早。載筆一心雄妙藻。氣橫渤澥邁千秋。豪動帝王容草草。一時會集俱時名。大夫緩頰四座傾。俠思如山能借客。貞心如水肯逢迎。清時稱幸爰書少。蘊藉爲郎窮浩渺。厚力憑陵萬里遊。詞華交映五雲曉。東南有美豫章材。孤高百仞何崔嵬。一柱天摩楨祕閣。森羅地軸起蘭臺。大國之風漢魏上。直數百代神猶王。黃序階前畫象流。白雲司裏雕龍蕩。南都文采高燭天。夏玉敲金誰是先。勸君漫把誇時輩。與君相須萬古前。城南晚眺云。返照駐南樓。眺奇郭外遊。烟光團帝里。雲物靜仙邱。二水清逾落。千山翠欲流。低回難便去。晚色繫人幽。留別青溪諸友云。叢雲疏木淡離筵。樓角三聲鴈去邊。歸客風塵看短劍。思君雲際誦瑤篇。驅猿獨出長千里。聽曲渾依古渡前。勝地從來悲去住。青溪壁月幾回圓。瑞穀于文極意憲。古故於時義少遠。將入貢京師。值督學使者至。考列四等。戊寅以書訊余。并述坎壈之態。爲咨嗟久之。然以瑞穀之文。上追左

馬開區區一青衫。奚足置牙頰也。

張仲立名文柱。崑山人。年最少。家貧。從其父遊業金陵。後歸補邑博士弟子員。邑木涇。周公復俊甚器重之。寔居一室。扁曰絲澠館。讀書賦詩。意澹如也。詩清新雋逸。然以窮愁故多羈栖咨嗟之語。其邀笛閣入社云。聯翩飛蓋鄴中聞。亦許褰衣一席分。白社有情邀弄笛。青山無恙記移文。浮杯暝墮秦淮葉。下榻寒生禁澤雲。久客不須愁歲暮。陽春曲裏正氤氳。雪中借馬云。不是郎官裘馬意。高人那得慰尋思。暫逢鄭客橋邊使。轉憶山翁醉後騎。曳履已無行雪恨。穿林猶爲看花遲。五陵年少如相問。可以驕嘶十里時。窗中度落葉云。裊裊回風下。蕭蕭薄歲陰。一山方隱几。片雨自前林。重以經霜色。淒其入曲心。高居尙搖落。不敢更登臨。青溪對雨云。十日臥長安。何人裹飯看。尊前今雨合。句裏客星寒。故國關河阻。他山烟霧寬。欲從荷蓑者。隨地著漁竿。市隱園鷗波云。聞道午橋莊。中連谷水陽。主人滄海意。都與白鷗忘。沙合寒烟積。磯深夜雨長。江頭風浪惡。常得聚迴塘。鬱鬱園中柳云。昔聞隋河柳。搖颺千里堤。至今名園內。常與東風期。陰陰羅曲岸。鶻鶻蔽芳池。靜倚高樓望。但見青絲垂。無烟亦慘澹。無雨亦離披。啼鶯出其中。聲聲動柔思。我欲一折之。恐使行人知。行人會有適。春華難及時。環碧樓云。不淺元龍臥。脩然百尺餘。神猶栖澗壑。目已到清虛。猿鶴中林近。烟霞四戶舒。自成招隱賦。眞笑買山居。相逢行云。聽我相逢行。悠然天宇孤。且攬鐵如意。起擊君唾壺。君不見人世飄緇多客卿。我來騎馬長干城。秋風落落今如此。帷下青雲心欲死。有賦難令天子知。有名不入時人耳。手提蒯緤劍。自歌行路難。一歌

白日沒。再歌夜漫漫。偶然聲遶梁。宜動諸君歎。諸君往往大夫才。更到憑高意氣哉。腰閒三尺綬。爲我俱徘徊。徘徊荆生市。爛漫阮公廚。不奏高卿筑。不彈隋侯珠。出門大道風塵黑。轉向風塵見狂客。或時執轡候升車。或時曳履迎逢掖。向來臨歧淚。對君頻拭之。滄江碧海渾無際。望入浮雲杳杳馳。浮雲馳處空山暮。言問山前邀笛步。隊隊征鴻斷故城。紛紛隕葉迷荒渡。隕葉征鴻思慘然。鳳凰臺畔起寒烟。昔人遺曲今人和。莫道相逢不可憐。聽我相逢行。視君眉宇都。我有逸思凌飛鳧。諸君況是翩翩者。金蘭之契古所無。爲君高叫揮桑榆。好手遭時亦易耳。百年鼎鼎何爲乎。今日荷君裾。他日夢君地。聚散由來萍梗輕。行藏稍涉英雄事。諸君一一廟堂身。我亦甘心白璧珍。門前長揖彭城相。別後相逢是故人。塞下曲云。有鴈逐歸心。無書返上林。天山陰不斷。秋至雪花深。白草分秦甸。清笳雜漢音。將軍橫戰馬。價是一千金。城南晚眺云。郭外千山傍夕看。稍凌高處覺衣寒。林疏寺靜將歸鳥。日落江深更急瀾。舊國淒迷芳草遠。佳人迢遞碧雲殘。烟中忽辨孤帆色。悔不從風寄羽翰。黃鸝篇酬朱比部云。黃鸝有修翼。汗漫青雲期。一飛薄九州。一息崑崙池。鷓鴣周十仞。恆苦渴與飢。幸蒙嘯拂意。因風覲光儀。天路不可致。躑躅從此辭。朝覽城闕閒。暮愁白日儀。依依玉林露。無由寄南枝。賢貴而愚賤。造物固如斯。惟當戀明德。感激以心悲。畱別社中諸子云。浪迹頻年類鳥居。羣公相繼枉籃輿。馬卿病徹遊梁後。莊鳥聲殘失越餘。去國浮雲常黯黯。還家寒樹半扶疏。長安米價今猶貴。更復何門可曳裾。仲立去金陵。攜黃孔昭詩。序而刻之吳中。嗟夫。世未嘗無知音。仲立子虛之賦。必有因狗監而得者。豈終於不遇也。

邵長孺名正魁。休甯人。父早卒。母夫人矢志鞠之。成長。乃肆力於古文詞。爲續劉更生列女傳。嘗遊梁客。燕已。又從燕客金陵。入青溪社。一日訪予官舍。會雨雪。余遣騎送之。因就社中作雪中借馬詩。遂爲一時佳倡。詩云。東郭先生淹待詔。西曹才子久稱詩。人憐玉樹朝相過。馬借銀鞍雪與騎。控縱自防身覺穩。迷漫那得路嫌遲。青雲先達容徐步。卻急京華歲暮時。美人走馬云。紅妝輕結束。紫陌逞芳春。色借桃花暈。蹄翻白雪新。似驕還似怯。憐駿復憐神。挽有金爲勒。行知玉是塵。過都應絕足。傾國復何人。一顧同千里。雙飛拌此身。逢歡楊柳陌。流盼見情親。窗中度落葉云。秋思動蕭蕭。前林送寂寥。隨風催入戶。帶露乍辭條。妾命應同薄。郎蹤豈盡飄。青年能再不。魂爲可憐銷。青溪對雨云。未了看山興。重登溪上臺。好風迎客至。今雨爲誰來。賦擬攀青桂。行知破翠苔。爲霖時已暮。相對且銜杯。贈陳子野明府云。二十年來傲吏身。陰成五柳傍溪濱。還將舊日鳴琴意。邀取風前弄笛聲。名士悅傾城云。月照流黃滿。情將芍藥深。豈緣矜國色。應爲得琴心。比翼看雙舞。和鳴識好音。青春願長在。莫遣歲華侵。留別社中諸子云。策馬燕關雲。一駐金陵雨。金陵城南樂事多。前輩風流尙堪數。誰家高閣青溪邊。集中冠蓋皆時賢。閣上署書邀笛字。令我恍惚懷當年。我曹意氣要自足。相逢何必論因緣。翩翩入座忘賓主。大呼岸幘羣公前。青溪主人陳子野。解官久作忘機者。埽地焚香自晏如。客來不厭同瀟灑。何知雋逸才莫當。參軍近地費與黃。朱君長者能任俠。起家況是尙書郎。句吳文學華公子。談經亦有詩名起。盛先袖出兩京賦。要與三都角長技。吳季揮毫先刻燭。魏朗同工翻異曲。莫卿早發雲閒龍。張郎神采崑山玉。

姚翁久宦稱客卿。一時通刺多豪英。清狂復見任光祿。疏曠何如阮步兵。羣公豈是平生好。以我片言盡傾倒。酌酒爲歡重布衣。結交卽晚知名早。邂逅親同落地親。男兒四海自比鄰。今宵興盡且歸去。明日重逢是故人。長孺有梁園燕臺詩。黎祕書惟敬序而刻之。丁丑余入覲。長孺入爲太學生。寓歐博士楨伯繡佛齋。相見歡甚。余別復贈以詩云。郡侯不與省郎同。倒屣猶存下士風。詩自中和稱益部。社會淪落問吳宮。時名海內千金重。世事尊前一笑空。霄漢憐才公等在。豈堪結侶五湖東。

方子及名沆。莆田人。舉戊辰進士。爲全州守。入爲南戶部郎中。爲文倣司馬史記。詩非大歷貞元以上語。不道也。當子及入爲郎也。予適出守渝。子及以詩送予云。君去停驂涪水源。回瞻清署白雲繁。山川舊記蠶叢俗。郡國新推五馬尊。巴徼鶯啼詞客興。嘉陵春徧大夫軒。懸知治行兼經術。報政先沾漢主恩。余去後。子及乃入社中。又以詩訊余云。別離猶憶帝城東。西去巴山指顧中。消息三秋疏鴈字。幃帷萬里入蠶叢。政成堪下黃金詔。賦就還傳白雪工。知爾高齋時北望。五陵佳氣鬱葱葱。其市隱園橋成云。臨流重結構。夾岸往來通。小艇迷花下。長虹落鏡中。客從蘿逕入。檻倚水亭空。興洽思題柱。高軒日過逢。同社中七君子。冶城納涼云。高閣憑臨野望寬。翩翩野客共登壇。百年逸興還河朔。七子才名自建安。牛渚風生檣影動。龍山翠落酒杯寒。悠然鐘磬江城暮。不盡狂歌更倚闌。聽竹云。淇園似在石頭城。半畝琅玕拂檻清。傲吏未忘麋鹿伴。空林忽作鳳凰鳴。聽來風雨千山暮。賦就瀟湘萬里情。自是王猷多逸興。還期尊酒坐深更。白鶴樓曉望云。紫殿嵩呼曉仗收。聯鑣猶喜訪丹邱。樓開白鶴來真氣。山對

青龍擁上游。曙色忽從雙闕散。浮雲不盡大江流。佳晨誰負登臨興。潦倒琴尊樂未休。雪後送康山人。兼懷元甫本甯云。白下初聞碣石談。何來朔雪動征驂。五陵俠客皆虛左。一日詞林見指南。去路丹楓江上盡。思家芳草夢中含。燕臺自昔多同調。矯首龍門意不堪。社中諸子夜集寓館。余以事後至云。結廬從容訪草堂。自公忽漫倒衣裳。到門有客題凡鳥。貰酒從人典鷓鴣。夜靜不妨清漏徹。雪殘猶傍彩毫光。怪來百里星才聚。稍似風流汝穎旁。雨夜同丁庸卿集。周璩方蔡諸子飲。弈云。結客張春宴。酣歌此夜偏。已拌清中聖。轉覺弈猶賢。雨急長江外。寒深短燭前。不緣投轄興。爾輩好誰憐。一局消幽事。清齋夜色虛。如澠行臘酒。帶雨摘春蔬。上客歌魚少。浮生夢鹿餘。當時嵇阮輩。軒冕意何如。開歲二日。文美仲玉子虛過飲云。椒花兩日媚佳辰。詞客招攜漢苑春。頌酒風流諸子在。談天意氣一時新。已知湖海狂相傍。更覺文章老自神。典盡鷓鴣堪共醉。清時那數獨醒人。姚典客陳明府姚太守安秀才陳吳周璩四山人小集寓館云。獨守元經心事遠。何來車馬款柴扉。懷中白璧俱明月。江上春星半少微。斗酒不辭今夜醉。庭花猶覺冒寒稀。早知詞賦追梁苑。彩筆憑陵四座輝。子及爲郎。以公用銀爲同舍所許。事甫白。又坐領敕事就逮。降二秩去。子及去。而青溪之社於是廢矣。

金山人在衡名。隴西人。從其父宦金陵。因占籍爲金陵人。在衡初爲諸生。才名藉藉。後刻意爲詩及樂府諸詞曲。一時名輩咸服其工。所著有徒倚軒集。爽蕭齋詞藁。年八十二。猶能作細書。余領渝州。山人贈之詩云。萬里橋邊憶舊遊。野雲江樹接天浮。懸知別路初經暑。只恐歸鴻已報秋。涪水東來通劍閣。

岷山西望達夔州。武侯相業文翁化。千古巴人頌未休。又云。遙憶青溪社。於今又五年。放歌明月底。長醉落花前。山氣平分楚。江雲半入川。不知垂老日。鴈足幾回傳。夕林初霽後。春服既成時。桃李含情久。瓊瑤報德遲。青尊憐遠別。白首幸深知。明月梅花夢。相思未有期。又寄余云。清世文章早見知。湖山蹤跡各天涯。荒蕪馬色勞延佇。細雨蘋香入夢思。江館正逢新釀酒。僧堂猶寄舊題詩。邇來料得文翁教。歷徧春風又幾時。

張太學猷翼。字幼于。長洲人。文名藉藉。以貲入爲太學上舍。王公貴人爭折節願與交。卽司成亦禮重之。不弟子畜之也。其爲詩清新雅麗。類其爲人。近著易說。尤爲時所稱云。有寄吳明卿太守詩云。曾于白雪見文章。不爲青山憶武昌。藝苑才名多七子。宦途心事半三湘。人前落筆看鸚鵡。郡內褰帷下鳳凰。見說漢庭思校獵。未容長孺薄淮陽。

黃山人孔昭。名克晦。晉安人。善山水。尤工詩。其爲詩意嘗獨造。一以古人爲宗。而不蹈襲其語。初從晉安泛彭蠡。遊匡廬。渡九江。登武昌黃鶴樓。吟眺久之。乃來金陵。在匡廬贈僧有道高弟子堪。傳少行苦。鄰僧共住難之句。盛仲交亟稱之。其與人交。默默若無所營者。一發之深沈之思。而奇句逸韻。見者動色。信隱淪之高致。文苑之端人也。其贈予金臺云。畫戟鱗鱗至。青春古北平。別來雙白眼。相見幾同聲。意氣尊前諾。循良闕下名。支離君莫問。天地且吾生。君入渝州後。新詩句句傳。孤雲飛楚峽。明月出巴川。春暖談交處。風生說劍前。請看河上柳。開葉爲誰憐。自芋源發舟至劍津云。畫船簫鼓霧中開。一日上

灘幾百迴。野樹白花還自落。水禽雙去忽雙來。金沙月亂星星影。錦石濤翻冉冉苔。五嶽從今遊迹徧。不因溪險阻徘徊。暮遊武夷至四曲。歸宿萬年宮。云千峯暝合水生輝。玉女潭邊返棹歸。拂徑藤蘿春自引。傍簷猿鶴夜相依。來時髮白從教變。夢覺身輕只欲飛。大隱屏西仙侶在。爲予種樹待成圍。病中風雨寄歐楨伯云。薊門衰病颯驚秋。風雨蕭蕭獨倚樓。四海新知名下老。頻年多病客中愁。雲連北極迷宮樹。水發西湖出御溝。京國逢君歡不淺。可憐經月不同遊。送顏範卿馬上值雨云。天涯雙鬢易成絲。何處淒涼不淚垂。花下一尊相送後。雨中匹馬獨歸時。逐臣離恨迷芳草。滯客愁心掛柳枝。明發西山風日好。道房禪榻與誰期。立馬古城下。云立馬古城下。日暮沙塵昏。齊國多義士。出自田橫門。田橫恥爲虜。不屈萬乘尊。二客甘自殉。感激驚乾坤。如何五百人。殞首無復存。寥寥海島中。烈烈千古魂。漢室諸侯王。誰非國士恩。礪刃起相向。俎醢何足論。歐楨伯博士邀集繡佛齋。時魏季朗郭建初程無過存上人同集。得家字云。四門已下先生榻。雙樹因過大士家。牀上詩書連釋部。桁閒袍帶雜袈裟。疏簾映日垂垂白。絳帳牽風故故斜。古調自應傾海內。同聲況復滿天涯。冰河赤鯉堆霜膾。火圍黃蔬煮綠芽。社友舊曾期惠遠。門生今更識侯芭。酒中爲壽身先起。醉後畱懽興卻賒。落日龍鍾扶上馬。寒天蕭索數歸鴉。陰沈九陌雲如墨。颯沓千林雪欲花。爲問何時還此集。吟鞭早拂五城霞。

梅禹金名鼎祚。一字彥和。宣城人。父參知公宛溪先生名守德。以直節聞。二伯氏才而早卒。禹金年尙幼。參知公尤愛憐之。禹金少攻舉子業。後稍厭棄之。而工爲古文詞。時王山人寅。陳山人鶴。俱從參知公。

遊最久。禹金因友二山人。又最暱。沈太史君典。予在白下。禹金來訪。已別去。癸酉復來。已下第去。然數以詩往來。問訊不輟。予守渝。禹金獨從數千里來。訊其白下寄余詩云。雄才原自豫章聞。列署風流盡屬君。珠自驪龍干北斗。錦從飛鴈破南雲。天低二水回青影。日落諸陵散紫氛。卽有金莖慰消渴。漢庭今重子虛文。延眺高林宿雨開。輝輝初日照樓臺。千峯寒影雲邊落。百道泉聲樹杪來。紫氣中原遙入望。鴻書南國若爲裁。翩然一嘯真何意。江漢風情濁酒杯。對酒酣歌倒著冠。中宵星斗共憑闌。三山只隔雙溪水。不盡寒雲醉裏看。別來事事轉堪憐。風葉霜花媚晚天。不分白雲西署裏。長隨仙客馬蹄旋。仙才吏隱大江濱。談劍飛觴坐夕曛。卻羨黃金能結客。因逢白雪倍思君。梅萼冲寒慙向榮。何郎名振鳳凰城。愁邊側望槭鸞漢。夢裏頻疑度鴈羣。渝州詩云。巴江楊柳幾回新。憶爾行春五馬停。舊日諸郎推起草。同遊詞客感飄萍。漢家良牧南陽頌。蜀道雄文劍閣銘。西望迢迢無一舍。暮蟬淒斷不堪聽。隔年萬里一書還。當代人才岳牧閒。矯首青雲懸蜀道。銷魂夜雨夢巴山。星疏朋舊驚華髮。歲暮空山戀苦顏。妒殺滄江江上月。憑君熊軾入燕關。故人五馬在。遠道一鴻稀。巫峽秋偏壯。蛾眉月自輝。邱中縱偃蹇。講上憶翻飛。不敢操流水。知音有是非。余入汴。禹金又訊余詩云。雙鯉巴江一札傳。西風木落又經年。逢人馬首中原入。憶爾嵩山畫戟前。十年開府未爲遲。回首青溪結社時。玉樹歌聲俱散盡。桓家一笛向君吹。一片飛雲入大梁。黃河北望正茫茫。從知幕府多詞客。日向平臺醉幾場。虛左當年意氣真。信陵千載尙如新。抱關小吏勞君問。亦有夷門任俠人。禹金之於交道厚矣。禹金詩甚富。有遊白岳

詩黃白遊藁已刻之宛陵其所自校而未刻者余爲之序。

黃進士雲龍王山人寅俱歙人夏山人日瑚錢塘人莫山人公遠吳人紀亳州振東程秀才應魁玉山人陳將軍經翰南海人俱先後來白下相倡和黃有社藁其人深沈多苦思說書自出意見與朱說稍異同然精者獨窺理奧非漫語也文宗六朝詩亦有致第甲戌進士卒夏詩已刻之社中王久有詩名有仲房集其人卓犖不羣書法亦佳甚嘗從塞上遊還至白下余贈之葛山人以詩謝有云秋來定擬攀鄆岳老去還從善寶刀殊有俠氣莫詩往往有奇語紀初宦粵中從吳按察明卿遊又從五羊諸騷人作社會最後遷亳州判詩刻甚富以母老歸玉山程善顏書詩亦清雅有客越藁陳少有才名晚乃棄儒服從塞上遊余官金陵爲序陳山人藁後從都下晤之逆旅則已鳴劍揮霍馳志伊吾非復舊日陳生矣嘗以詩訊予淪州云巴江西望賦停雲五馬音徽久不聞彈鋏人前猶滯遠折梅天畔益思君風塵自厭遊燕日富麗誰雄喻蜀文尙憶秦淮爲別意至今淒斷鴈鴻羣太守聲華北斗懸才情原是藝林賢爲花郡閣晴相媚書劍天涯秋可憐客計吾惟餘短髮遊囊人自重名篇半生漂泊思投筆莫忘青雲一札傳

汪仲淹名道貫汪仲嘉名道會歙司馬公伯玉弟也族叔子建名顯節吳人與邑文學程子虛謝少廉結豐干社山中癸酉來白下費民益任山甫同余置酒莫愁湖招之仲淹俱來而程以事不至時宣城沈君典亦遊白下仲嘉曰有一客在但不速卽來速之卽不來矣已君典至大笑劇飲各卽席賦莫愁湖

詩明日子虛亦以詩來遂成勝集。仲淹下第歸。數以書相問。甲戌四月。從子建北上。道中以書訊予。渝州并棧所爲詩相示。仲淹下第云。得路難如此。飄零似去年。曉風城上月。秋水鏡中天。咄咄悲生事。勞勞問酒錢。啼猿與征鴈。總使淚潸然。有弟猶分散。無天不可呼。斷鴻依落日。匹馬泥長途。一爲芳顏誤。俱令綠鬢徂。平生肝胆在。終不落江湖。

歐楨伯博士名大任。南海人。少與梁比部公實黎祕書惟敬梁廷評彥國結社山中。以貢入京。授江都教諭。遷光州學正。聞母疾棄官歸。服除。遷國子博士。爲人慨忼。不爲儒生尋摘章句。其大槩具王中丞浮淮序中。余丁丑入計。謁楨伯繡佛齋中。邵長孺適在寓。楨伯出酒爲歡。意氣甚相許。可贈余詩云。新年逢計吏。大郡得雄才。學豈巴渝曲。歌從燕薊來。春秋將入對。旦夕且銜杯。知奏文翁最。諸生待爾回。余還蜀。贈詩云。前殿春開五丈旂。諸侯班瑞寵行時。政成小苑栽桃竹。賦就東樓壁荔枝。巴岳雪消飛騎遠。岷江濤起掛帆遲。翰音朱博君差勝。更有風流蜀郡詩。都下和答潼關見寄云。百二關城借使權。河山半在節樓前。仙人掌上浮雲過。玉女池頭片月懸。舊好幾家畱筆札。中原何地問橐鞬。側身西望驂騑遠。沈陸金門祇自憐。楨伯雖以詩自見。然海鶴雲鴻。神志固遠。會惟敬掛冠南還。意落落。嘗擬拂衣去。然今公卿愛才禮賢。知楨伯者不少。恐當不得賦遂初也。楨伯詩有浮淮輶中南。蕪北轅詩藁。多不錄。錄所未刻數章及浮淮集序。可以知楨伯矣。答張助甫涼州見寄云。涕淚臧書手自題。故人偏憶庾安西。孤城落日臨青海。千騎浮雲過月氏。射石不妨能飲羽。閉關何事更丸泥。越吟僅得餘雙鬢。莫向

風塵問執珪。送金子魯督學楚中云。文藻風流爾獨雄。傳經寵借省曹中。明珠今出隋侯握。白雪深知郢客工。游獵堪誇雲夢澤。題詩應滿祝融宮。五花暫向都亭別。一躍還堪氣似虹。司馬曾公澹然齋玩梅云。尺書邀賞鳳城隈。獻歲春因淑氣回。齋裏花停羌管奏。尊前雪待郢歌來。上林漸及芳菲日。東府今推賦咏才。獨有何郎驚節序。十年官閣興偏催。仁聖太后壽日午門酺燕云。內殿承歡步盪趨。九枝燈裏六龍扶。陛前萬國朝方岳。闕下千官慶大酺。膳使頒分青豹髓。酒人擎出紫駝酥。金門愧似東方朔。三沐皇恩在漢都。

胡文甫名汝煥。洪都人。予讀書洪都時。文甫從其父南湖先生居同仁。年可十一二。見之娟娟然。瑤瓊瓊珥。美好童子也。然洪都爲舉子業者。則已推文甫。文甫又與余弟仲爲同仁會。余見文甫舉子業。獨有奇氣。蓋心服之。文甫庚午舉於鄉。又七年計偕入京師。歐楨伯見文甫詩。爲予嘖嘖誦不輟。予以計吏不卽得謁文甫。比事竣。投刺邸中。文甫知爲予。乃出握手。敘論往昔。然後把予詩讀之。余爲西山遊。文甫以他事不得往。旣下第歸洪都。李襲美書責文甫西山詩。文甫乃爲西山詩以報襲美。且爲序述其意曰。李京兆于美。朱太守秉器。爲予治裝遊西山。諸刹予方疲於津梁。不得往。黃徵君孔昭往之。各以履歷諸勝紀詩若干首。事在秉器語中。予旣歸豫章。于美走書并詩責和。展讀數四。神情自王。風雅各殊。嵐光水色。起自據梧。竹韻松聲。生於疑壁。真藝苑之慧筌。詞宗之上乘也。余不揣謹依來玉。謬酬俚音。附驥之私。真可爲慰。續貂之誚。是所免乎。草具如左。金山寺燈字云。尋山君自好。林路恍然登。看竹

無論主拈花不問僧。諸天憑指掌。半偈了傳燈。予亦逃禪者。相從恨未能。華嚴寺航字云。最是關情地。追陪此上方。千峯凌日起。一水浸天長。遙望諸陵紫。時驅我馬黃。到時爲彼岸。何必問慈航。碧雲寺遙字云。古刹倚岩曉。峯峯插絳霄。諸天攜縹緲。雙屐轉逍遙。流水如鐘磬。長松似獨獠。攀緣忘去住。身世半漁樵。寶林寺蕭字云。林壑意蕭蕭。遊仙去不遙。泉飛三竺練。鐘落五湖潮。小憩臨空翠。高談破寂寥。山中多桂樹。莫謂隱難招。宏恩寺懷字云。思君如日月。朗朗照人懷。自謂交難合。由來與與諧。營生無長物。繡佛有清齋。一別經芳草。離心徧九垓。香山寺陰字云。不禁春到此。想憶一何深。自汝開雙徑。堪誰賦上林。山根晴亦雨。洞口晝長陰。盡解遊人意。還依靜者心。延壽寺連字云。人世真難遇。春風一笑前。鴻濛開色界。林響落鈞天。峽斷雲爲水。村虛柳是烟。懷君如戀景。一步一畱連。山字云。風塵偏傲吏。杖屨有名山。鼎立文章事。昂藏意氣閒。華夷天作塹。南北燕爲關。康濟還公等。遊情未是閒。古風贈于美乘器云。太行接天亘天起。蜿蜒長城一萬里。天子不聞西擊胡。但見遊人似流水。成都太守心自閒。宛平京兆風可攀。我欲從之行路難。遙望白雲永長嘆。送乘器于美西遊諸刹同志近感云。遙望旌旗指翠微。吏情真與世情違。飄然五馬同杯渡。去矣雙鳧傍錫飛。白雪自高同調寡。青山不改故人稀。浮生天地終爲寄。采盡芙蓉亦當歸。其六郡良家子云。六郡良家子。翩翩意氣雄。結營當大白。吹劍拂長虹。心折胡塵外。名高漢殿中。請纓君等事。長揖莫論功。秋日答張幼于云。登高望四海。藹藹見停雲。何物真如練。相思疑似君。愁從今日至。書以故人聞。一葉猶千里。關河落鴈紛。康裕卿黃孔昭邵長孺胡

仁仲集盛秦甫宅得隈字云。北斗近城隈。西山照酒杯。無妨車馬地。不是狹斜來。白雪如今事。黃金自古臺。平生多感慨。臨眺獨徘徊。又得遠字云。意氣看如此。滄洲諒不違。同聲歌一曲。千里和應稀。寒月當尊墮。春雲傍酒飛。長安無限景。偏照薜蘿衣。秋懷寄潘文學云。北斗插天天欲斜。水樓殘夜蕩荷花。雲流廬嶽杯當手。月泛銀河客在槎。三輔故人猶蔓草。兩湖秋水已蒹葭。安仁更有閒居賦。莫遣星霜到鬢華。答張伯起見訪京邸之作云。尊前曾問白鷗狂。何意萍蹤又帝鄉。葭菼東吳人是陸。星槎南斗客爲張。相看鬢髮蕭蕭短。一說肝心字字長。握有崩緹操不得。知君袖裏是干將。同康裕卿陳忠甫黃公補公紹蔣兆卿人日集盛秦甫宅得年字云。黃金諸子盡翩翩。長見飛翻綵筆前。春色更逢人日好。寒光猶借客星懸。時名一附三千牘。意氣何須十萬錢。尙有小山招未得。攀援桂樹不知年。卽景口占呈魏父佳父二仲云。無數飛花欲暮春。萋萋芳草倍憐人。吳鉤翠削芙蓉麗。楚服青裁薜荔新。三徑只緣何客埽。一尊偏向故交親。談天況是高陽侶。遮莫風流藉角巾。集張徵君節伯宅得侯字云。長缺歸來且敝裘。一尊寒色共江流。村當白社尋高士。人在青山拜隱侯。三楚樓臺明月夜。五陵烟樹碧梧秋。投珠何地無知己。不謂風塵已倦遊。

友人張助甫爲予言。任楚臬時。與同官遊河上寺。寺有洞。下瞰深潭。水色澄綠。殊可人意。潭龍靈怪不測。歲禱雨恆應。是日張筵洞中。坐甫畢。有彩虹從潭起。其光射日。倏忽薄洞門。若窺而入者。四座辟易。酒不及舉。又無所避匿。咸以爲神。良久影漸落入潭中。蓋平生目所未覩也。因賦詩云。古刹臨峭岸。下有

千尺淵。開門見波濤。洪汝左右盤。火雲垂到地。兩兩掛前川。飄風自南來。爽氣灑衰顏。慧日俄迴照。雙虹動我前。乃知炎蒸地。別有清涼山。顧瞻諸天裏。蒼茫一龍還。先儒釋蟬螭之詩。謂日與雨交。倏然成質。乃天地之淫氣也。然河上之虹。乃起自深淵。薄於巖洞。若有知者。考諸載記所言。若飲薛願之釜。入子良之宅。劉義慶廣陵之粥。振戶有聲。章南康郡庭之筵。若驢爲首。或自蝦蟆赤鵠。或化女子丈夫。要之。物理茫昧。不可一端測也。

余北還入楚。郵傳中題咏甚多。如諸鉅公篇什。炳炳無論矣。乃海內未知名者。若潁陽外史林掖章。題長灘館壁。由楚歸梁。過界嶺遭雨。呈儲見雲年丈云。相逢無復接輿狂。風雨千山過楚鄉。主聖何須歌鳳德。途危猶自怯羊腸。完來和璧真如月。佩得虔刀已似霜。歸去閉門辭載酒。蕭齋白日著書長。林中州仕楚別駕乞歸者。然不可考其科名邑里矣。

續玉筍詩談

古人詩得意句不厭重複。王右丞桃源行有云。峽裏誰知有人事。世中遙望空雲山。蓋兩用之。此其妙在有意無意之間。雖右丞不自覺也。而岑嘉州太白胡僧歌云。山中有僧人不識。城裏看山空黛色。卽右丞意也。嘉州豈蹈襲人者。蓋觸象寫微。冥搜神會。意之所到。自然合作。乃知理在人心。亘千萬人千萬世無不妙合。甯獨王與岑也。

漢王莽傳。三輔盜賊麻起。李白永王東巡歌。三川北虜亂如麻。麻字本此。一時讀之不辨也。古人詩無一字無來處。信然。

太白長干行。八月胡蝶來。唐文粹作胡蝶黃。謂秋蝶多黃。白樂天詩云。秋蝶黃茸茸。亦此意。然不若來字佳。

李紳鎮淮南。張又新罷江南郡。過淮。張有夙嫌。投之以刺。乃釋舊憾。宴飲極歡。又新從事廣陵時。眷一酒妓。終不果納。至是二十年。猶在席。又新以酒染指。題詩盤上。命李妓歌以送酒。妓歌此詩。紳問曰。張郎中於汝致情乎。妓泣下沾襟。因命妓侍張。詩曰。雲雨分飛二十年。當時求夢不曾眠。今來頭白重相見。還上襄王玳瑁筵。或者病之。謂旣云求夢。何曰不眠。不知求夢而不眠。卽致情而不果納之意也。說詩

者乃以詞害意未爲通論。

杜牧之阿房宮賦云長橋臥波未雲何龍復道行空不霽何虹詞最新麗而譏之者云誤用龍見而雲事謂龍乃龍星非龍也不知杜所用乃雲從龍之龍正取易雲從龍之義蓋雲而非雲也少陵詩云日落青龍現水中與此正同且雲與霽正相對若作雲乃祭名也有何義相涉而引以爲偶耶。

予鄉新修寺古伏魔寺也舊邊大江今移置山中岳忠武王飛曾駐兵馬留詩壁閒曰膽氣堂堂貫斗牛誓將直節報君讎斬除元惡還車駕不用登壇萬戶侯。

金黃華老人詩帝遣名山護此邦千家瑟瑟嵌西窗山僧乞與山前地招客先開四十雙胡蒙溪真珠船云四十雙人多不知其義按元李京雲南志略云諸夷多水田謂五畝爲一雙然輟耕錄所載謂白夷種田以牛爲雙謂四角爲雙則所謂雙者雖指田而實因牛也少時於友人黃汝修家見此不解黃後訊之潘氏子指輟耕錄爲對檢之果然乃後悔讀書不多也潘儒家子貧訓蒙自給云。

陶靖節讀山海經十三首宋姚寬以今本差誤各爲之註釋惟第十三篇云巖巖顯市朝帝者慎用才何以廢共鯨重華爲之來仲文獻誠言蓋公乃見猜臨沒告飢渴當復何及哉共鯨引竹書紀年神異經釋之矣而下云仲文蓋公未詳愚按仲文乃仲父之誤蓋公卽姜公也意指管仲論易牙豎刁開方事耳後讀顏氏解甚詳乃敢自信孝威博學多識乃闕疑若此因是服前輩之愼。

新喻簡西巒紹芳遊滇南有題昆明池廢妙湛寺詩云昆明池中妙湛寺延祐露碑空記年螺房布地照

白日鷓草被牆生花烟。圮臺竟作田父逕。欵塔尙參先佛天。山門囂散夜岑寂。燐火續燈漁叩船。此詩寫廢寺岑寂之態。良自苦心。其自言云。鷓草二字。雖出詩邛。有旨鷓句。然心每不安。後見嚴氏曰。古人名物。多取形似。瓠之細腰者曰蒲盧。故蜂之細腰者亦名蒲盧。正如綬草綬鳥。皆名以鷓。青黑之莢。青黑之鳩。皆名以鷓。乃宿疑頓釋。

長卿家徒四壁立。已爲貧矣。韋蘇州答李潛云。相如猶有壁。漁父自無家。是以今事翻古案也。蔡謨戲王導曰。短轅犢車。長柄塵尾。而期慮嵩無馬不赴云。莫道無來駕。知君有短轅。是以古事翻今案也。他如無情尙有歸。行子何獨難。臨觴自不飲。况與故人遠。不見心尙密。况當相見時。莫道無相識。要非心所親。人意有悲歡。時芳獨如故。不是平生舊。遺蹤要可傷。皆抑揚其語。而意度自遠。謂蘇州止於平澹。要非至論。

曲罷碧天高。餘聲散秋草。人生豈草木。寒暑移此心。草木知賤微。所貴寒不易。年華逐絲淚。一落俱不收。雲澹水容夕。雨微荷氣涼。都門且盡醉。此別數年期。須臾在今夕。尊酌且循環。別離從何生。乃在親愛中。昨遊忽已過。後遇良未知。別思方蕭索。新秋一葉飛。禁鐘春雨細。宮樹野烟和。我懷自無歡。原野滿春光。同是山中人。不知往來躅。日日生春草。空令憶舊居。野曠歸雲盡。天清曉露新。客從東方來。衣上灞陵雨。銜恨已酸骨。何况苦寒時。佳人不再攀。下有往來躅。雨餘山氣寒。風散花光夕。存亡三十載。事過悉成空。甯知故園月。今夕在茲樓。微雨夜來過。不知春草生。皆玩之而有餘色。咀之而有餘味。其他

幽情遠韻，爲前輩所稱述者，姑置弗論也。

茫茫黃出塞，漠漠白鋪汀。鳥去風平篆，潮回日射星。相傳爲宋詩人龍大初咏沙詩也。然予少時觀陸天隨魯望集，已有之矣。豈宋人誤耶？又處士不生巫峽夢，空勞神女到陽臺。乃唐洪都西山處士陳陶辭妓詩也。而相傳以爲陳希夷，蓋緣姓而誤也。

事有出於前古，而好異者引以傳諸當今。曩毛尙書征安南，相傳世皇贈以詩云：大將南征膽氣豪，腰橫秋水呂虔刀。然不知爲高皇送楊文詩也。麻苗亂時，有錦鱗箇箇密如針之詩，不知爲滇中夷酋作也。趙風子亂時，有虎賁三千，直抵幽燕之地。龍飛九五，重開混沌之天之句，不知爲元末韓林兒語也。第以混沌易大宋耳。近有作道聽錄者，指黃巢咏菊，元梁王曉行之作，以爲高皇。宋人譏高宗養鴿詩，載葉子奇草木子，而以爲武宗北狩書，非異聞，時非久遠，尙謬妄若此。况遠且僻者哉！

李于鱗選唐詩內，李愔奉和聖製從蓬萊向興慶閣道中留春雨中春日之作，應制一首云：別館春深淑氣催，三宮路轉鳳凰臺。雲飛北闕輕陰散，雨歇南山積翠來。御柳遙隨天仗發，林花不待曉風開。已知聖澤深無限，更喜年芳入睿才。因與王維同一詠，當時附入維詩之後，而刻詩選者不爲較別，乃混於維詩之後，遂雜於維敕賜百官櫻桃四首之前。後刻詩刪者，遂以四首爲愔詩，又刪去此首，增入維詩二首，共櫻桃四首，殊爲可笑。唐詩紀收愔詩，止和戶部楊員外伯成同望幸新亭賜錢公宴，共此篇正三首耳。

西畧詩話云。殷璠集李白詩。有沙邱城下寄杜甫云。我來竟何事。高臥沙邱城。城邊有古樹。日夕連秋聲。魯酒不可醉。齊歌空復情。思君若汶水。浩蕩寄南征。其風骨音節。爲白詩無疑。後人不之見。以爲李無寄杜詩。乃僞作飯顆一絕。淺俗特甚。未有一字似白語。予觀白集。又有魯郡東門送杜二甫一首云。醉別復幾日。登臨徧池臺。何時石門路。重有金樽開。秋波落泗水。海色明徂徠。飛蓬各自遠。且盡手中杯。蓋不止沙邱一首也。然攷殷集無沙邱詩。意近日新刻者省工費而刪之耳。近百家唐詩亦然。至有取一人之詩。僞作三四人者。可歎也。

臨潼驪山華清宮。溫泉在焉。中有萃玉亭。皆宋元及今人詩刻。內杜常詩四篇。曉至華清云。東別家山十六程。曉來和月到華清。朝元閣上西風急。都入長楊作雨聲。夜雨晨霜云。柏葉青青櫟葉紅。高低相倚弄秋風。夜來雨後輕塵斂。繡出驪山嶺上宮。溫泉云。已去開元四百年。此泉猶自響潺潺。也。知不憤當時事。長作悲聲恨祿山。驪山云。漁陽烽燧起雲閒。玉輦蒼黃下此山。何事君王自神武。區區南渡鹿頭關。前題權發遣秦鳳等路提點刑獄公事太常寺杜常後跋云。正甫大寺。自河北移秦鳳。元豐三年九月二十七日。過華清。有詩四首。詞意高遠。氣格清古。邑人曹端儀。旣親且舊。因請副本。勒之方石。以傳不朽。閏九月初一日。穎川杜詡記。及觀楊修撰丹鉛餘錄。載詩話云。杜常方澤。在唐人中名姓不顯。惟存華清宮一首。孫公談圃以爲宋人。近註唐詩三體者。亦引談圃而不正其非唐人。蓋不欲顯選者之失耳。予又見范蜀公文集手記。一時交游中有杜常名姓。不註曰詩學。又宋史有杜常傳云。杜太后之

姪能詩。以史與談圃手記參之。爲宋人無疑矣。修撰當時豈未見茲刻耶。然前詩首句云。行盡江南數十程。曉風殘月入華清。而此刻稍異。今臨潼志竝存之。一作唐杜常。一作宋杜常。又驪山首句。大類唐吳融華清詩。僅易數字。豈杜熟唐人詩而暗合耶。抑用其語而稍易以後意也。又溫泉詩。年山非一韻。而志作宋王素詩何也。石刻真與僞。良不可知。以多識如楊公。當時何不見此。惜生也。晚不及一請質也。

古今明妃詩多矣。曩見閩公書林公嫌云。當以儲光羲爲第一。蓋卽事寫情。更無長語。而殊域不堪之態。盡於二十八字中。真知言也。其詩云。日暮驚笳亂雪飛。旁人相勸易羅衣。強來前殿看歌舞。共待單于夜獵歸。但窮廬毳帳。無宮室城郭。詩云前殿。殆非事實。然老上有龍庭之稱。恐匈奴中或別有殿名。未可知也。考明妃事。班史紀之甚詳。無足道者。青冢之傳。畫史之誤。良不可信。自石季倫濫觴爲曲。而後世詞人。連篇累牘。競新角異。總之。不出哀怨悼惜。更無質其謬者。杜陵氏。百代詩聖也。而猶祖雜記之說。何也。至琵琶胡語。本出烏孫。季倫創之。後世不察。竟指爲一事。又可發笑矣。

鄱陽山中有木客。秦時因造阿房宮入山。食木實得不死。時下山就民間取酒爲詩云。酒盡君莫沽。壺乾我當發。城市多囂塵。還山弄明月。又李道昌大歷十三年爲蘇州觀察使。一日郡城外虎邱山。有鬼題詩二首。隱於石壁之上。云。青松多悲風。蕭蕭聲且哀。南山接幽隴。幽隴空崔嵬。白日徒昭昭。不照長夜臺。誰知生者樂。魂魄安能迴。況復念所親。慟哭心肝摧。慟哭復何言。哀哉復哀哉。又曰。神仙不可學。形

化空遊魂白日非我朝。青松爲我門。雖復隔生死。猶知念子孫。何以遣悲惋。萬物歸其根。寄語世上人。莫厭臨芳尊。莊生問枯骨。王樂成虛言。道昌異其事。遂具奏聞。準敕令致祭。道昌爲之文曰。嗚呼。萬古邱陵。化無再出。君若何人。能閑詩筆。何代而亡。誰人子姪。曾作何官。是誰仙室。寂寞夜臺。悲乎白日。不向紙上。石中隱出。桃源三月。深草垂楊。黃鶯百囀。猿聲斷腸。不題姓氏。甯辨賢良。嗚呼哀哉。嘆昔先賢。空傳經史。終無再還。青松嶺上。嵯峨碧山。大唐正業。已記時言。痛復痛兮。何處賓。悲復悲兮。萬古墳。能作詩兮。動天地。聲悲怨兮。淚沾巾。感我皇兮。列清酌。願當生兮。事明君。祭後數日。再有詩一絕於石曰。幽冥雖異路。平昔忝攻文。欲知潛寐處。山北兩孤墳。寺後山之地。果有二墳。極高大。竟不知何姓氏。又酉陽雜俎載鬼詩云。流水涓涓芹吐芽。織烏西飛客還家。荒村無人作寒食。殯宮空對棠梨花。又爺孃送我青楓根。坐見青楓幾迴落。當時刺繡衣上花。今日爲灰豈堪著。又江上梳竿一百尺。山中樓臺十二重。老僧樓上望江上。遙指梳竿笑殺儂。又一徑入青松。飛流淡晴綠。道人晚歸來。長歌振林谷。山深不知求。落葉下枯木。須臾翠烟銷。月色照綵服。

成都天甯寺。西廊有僧寮一。余以重慶入省。謁上官寓焉。堂有墨竹一幅。陳南賓題其上云。九疑何處泣。湘靈汗簡裁。成數尺。綾鶴馭已迷。胡蝶夢。龍香猶溼。鳳凰翎。將軍節操。凌冰雪。主器文章。麗日星。白髮小臣懷舊德。摩挲遺墨淚交零。其前有題云。雪樵下筆寫琅玕。意在湘江萬玉閒。幸得披圖洗詩眼。恍如僧寺一偷閒。又勤有者題其後云。老榦垂秋雨。蒼根洗濁泉。虛心三百尺。高節幾千年。詳陳之詩意。

竹乃明玉珍所寫。而所謂主器者。或卽昇將軍者。或戴壽鄒興輩耶。勤有似是隱語。豈明氏遺裔耶。漫識於此。

鄱湖之戰。資治通紀等書。皆以爲郭興建火攻之策。遂獲全勝。偶視他載記。謂僞漢以火舟來攻。而天忽反風。敵舟悉自焚焉。此殆有天助者。予初不謂然。及觀鄉先達周所立先生康浪山歌。始知聖明之興。固天所命。大風揚沙。實基漢業。千載而下。異事同符。固不誣也。歌云。康浪歌。鯨鯢振鬣揚洪波。天子親乘六龍駕。樓船巨舸高嵯峨。翠華搖搖懸日月。左秉白旄右黃鉞。縱橫大戰數十圍。錦浪翻紅漲腥血。敵常脂韋張毒氛。北風反火輒自焚。焦頭爛額沈波裏。奄忽蛟飛水上軍。山爲組兮水爲練。自古英雄無此戰。威聲振撼馮夷宮。殺氣奔騰龍伯殿。康浪水。康浪山。霸氣奄忽烟焰開。鼉鼉蝦蟹總淪沒。猘獮梟獍無生還。軒轅指南報飛轂。康浪坐令爲涿鹿。小鯢中身赴鬱攸。大鯨左目中箭鏃。我皇笳鼓震溟洲。凱歌歸奏丹鳳樓。降軍十萬散海浦。太白曉掛蚩尤頭。康浪山。康浪水。王業艱難自茲始。海宇清平垂萬年。敬獻頌歌繼青史。周先生國初人所傳聞。當不謬也。赤壁之戰。阿瞞以數十萬衆火於東吳。而杜紫薇云。東風不與周郎便。銅雀春深鎖二喬。此言似辨而理。孫武火攻篇亦云。發火有時。舉火有日。蓋用火攻之策。當察風之有無逆順。此於水戰尤當審之。若田單火牛。其勢必往以奔敵軍。固無俟他虞矣。

石鐘山在湖口縣。當彭蠡之衝。上下二山。嵌空峯巒。余以丁卯北上南宮登焉。閱蘇文忠詩敘。謂山下有

巖洞江濤流轉觸而成聲。又謂上有魚池。今廢不存矣。自文忠而外。又有吳明卿。陳于韶。二參伯詩。明卿云。楚客登高秋思濃。白雲隨杖入芙蓉。九江落日迷山市。萬壑寒濤響石鐘。古閣懸空愁過鳥。輕帆挾雨帶飛龍。俯看天塹雄南北。何事中原有戍烽。于韶云。一片孤城雙石鐘。稜層傑閣隱芙蓉。雲摧峭壁愁黃鶴。雷起陰潭上白龍。楊子暮潮搖極浦。匡廬殘雪見中峯。乾坤今古雄天塹。卻訝南州有戍烽。一眺滄波萬里流。東南吳楚坐中收。峯高烏鵲凌寒渡。水闊鼉鼉吹浪遊。落日倒翻河漢影。斷虹長掛石梁秋。天涯憔悴誰能醉。芳草浮雲處處愁。時吳以南康節推游陳。以豫章參伯西歸。芳草浮雲。殆有旨也。于渝州入覲。于韶自閩從邱使君之請。爲文以贈。蓋余初不相聞。而蜀有覲者。于韶初未以文贈也。予感其誼。賦詩謝之。于韶答以詩云。使者書來問水濱。草堂芳訊忽嶙峋。豈云聞俗憐憔悴。耐可論交到隱淪。經術一時歸大雅。巴渝何地不陽春。舊遊竟阻登龍會。慚愧南州下榻人。于韶在豫章。吏事精敏。每文牒旁午。一一按閱。批摘如神。諸胥吏咋舌。不得出一語。其歸也。意或爲忌者所中云。

釣魚城。在合州治東北。城下十五里。有溫湯寺。山如翔鳳。泉出山中。氣勃勃。流爲浴池。又從池遠出。殿前爲大池。迂回曲折。清煖可掬。有魚黑色。游池中。又左流入前浴池。池三四。皆覆以屋。又從池遠山下流。入江。亦一勝境也。陳督學玉叔行部合州。因游焉。有遊溫泉兼懷社中諸子詩云。招尋古寺酒尊同。濯得溫泉興不窮。芳樹青山春更好。上方朱閣晚尤紅。二千品秩稱良吏。十五詩篇見國風。記得向來投贈意。故人多在大江東。

升菴楊先生題唐僖宗行宮柱礎云。唐帝行宮有露臺。礎蓮幾度換春苔。軍容再向蠶叢狩。王氣遙從駱谷來。萬里山川神駿老。五更風雨杜鵑哀。始知蜀道蒙塵駕。不及胡僧渡海杯。礎今故在。游大初爲予言。寺僧令匠鑿而丹之。乃知李文饒方竹未嘗無對。

升菴楊太史年十三過馬嵬賦詩云。鳳輦恩愆下九天。馬嵬西去路三千。漁陽鼙鼓烟塵裏。蜀道淋鈴夜雨前。方士遊魂招不返。詞人長恨曲空傳。蛾眉尙有閒邱隴。戰骨如山更可憐。殊有諷咏。又唐溫庭筠云。穆滿嘗爲物外遊。六龍曾此暫淹留。反魂無餒青烟滅。埋血空山碧草愁。香輦卻歸長樂殿。曉鐘還下景陽樓。甘泉不復重相見。誰道文成是故侯。亦有致校義山駐馬牽牛。不知誰復先後也。

桃川洞在常德武陵縣。洞出方竹。卽晉漁人遇秦隱者處。然洞當孔道。又乏流泉。似非當時舊跡。疑好事者因陶記而附和之。與邑有楊生者。題對聯二。頗佳。其一云。仙跡久荒。方竹依然環洞口。神機誤洩。清流無復到人閒。其二云。半空風雨灑天台。樵子留連。直要看盡了一番棋局。滿壁烟霞。迷石洞。漁郎消息。只因誤放出幾片桃花。先大夫有詩云。故事相傳始晉秦。桃花依舊往年春。明庭萬里重來譯。流盡殘紅誰問津。

統志載忠州有荔枝樓。爲白香山建。詩云。荔枝新熟雞冠色。燒酒初開琥珀香。欲摘一枝傾一醞。西樓無客共誰嘗。今忠州更無荔枝。惟涪有荔枝園。臨江挺荔樹一。相傳爲楊妃時所植。予未至前三四年。尙生。今惟枯榦存矣。意居民及有司疲於將送。故殺之耶。江津縣治亦有荔枝園。問之縣令。今亦枯死。

矣。

唐士人投刺不得獻詩。有無錢乞與韓知客。名紙毛生不為通之句。後有萬彤雲者。為白太傅所知。遊梓

州。累為閹人艱阻。為獻以詩。盧尚書宏宣乃怒閹者而禮之。詩曰。荷衣拭淚幾回穿。欲謁朱門抵上天。

不是尚書輕下客。山家無物與王權。蘇秦云。謁者難見如鬼。王難見如天帝。因鬼見帝。自昔固歎之矣。

古詩。橐砧今何在。山上復重山。何時大刀頭。破鏡飛上天。藥砧謂砧夫也。山上山田也。大刀頭。瑣還也。破鏡上天。半月形月初也。又石闕生口中。銜

碑不得語。石闕謂碑也。又梁簡文詩。圍碁燒敗襖。著子故依然。碁著子也。燒。敗。襖。然。故。衣。也。又蘇長公蓮子擘開須見惹。意。

楸枰著盡更無碁。期也。破衫卻有重縫也。逢也。日一飯何曾忘卻匙。時也。即黃絹幼婦外孫齋白之意。

黃巢五歲時。侍翁父為菊花聯句。翁思索未就。巢信口應曰。堪與百花為總首。自然天賜赭黃衣。巢父怪

欲擊之。翁曰。孫能詩。但未知輕重。可令再賦一篇。巢應曰。颯颯西風滿院栽。蕊寒香冷蝶難來。他年若

我為青帝。執與桃花一處開。又云。待到秋來九月八。我開花後百花殺。衝天香陣透長安。滿籬盡掛黃

金甲。後舉進士不第。聚眾為盜。號衝天大將軍。此事載貴耳集及清夜錄中。然記曩有一小說中載此

詩云。百花發時我不發。我開花後百花殺。衝天香陣透長安。滿籬盡掛黃金甲。與前小異。覺莊質類。巢

語。前二詩。或記載者稍潤色之。未可知也。後詩第三句。或改云。要與西風戰一場。而謬以為高皇詩者。

大可笑也。宋太祖少時咏日云。初出海時光輝燿。千山萬山如火發。須臾捧上一輪紅。趕退殘星并殘

月。後更臣潤色之曰。未離海底千山暗。纔到中天萬國明。大與此相類。

莊定山昶節婦詩云。二十夫君棄妾身。諸郎癡小舅姑貧。自甘薄命同衰葉。不埽蛾眉嫁別人。化石未成猶有淚。舞鸞雖在不驚塵。瑣窗獨對東風樹。歲歲花開他自春。羅一峯先生倫評之云。苦心苦語。可泣鬼神。簡西密詩話謂起俚淺而中穠冶。似非本色語。推取楊石齋一聯云。烝嘗所寄惟黃口。形影相依到白頭。然一峯亦有詩云。婦人自我如男子。造化由他似小兒。較莊稍實。近塵談載謝子象一詩云。朗日行天夜照星。私嚴淵默竦雷霆。苦經世故艱危地。要保人閒婦女形。萬事到終頭已白。九原識面眼猶青。敢偷一死全遺息。莫道冥冥夢不醒。庶幾擺脫陳俗。而不拘拘用事者。然起句似書生語。結亦稍不稱。蓋節婦入律詩中。較難著力。要當於古選中求之。

王中丞扈言云。正德閒有妓女。失其名。於客所分咏。以骰子爲題云。一片寒微骨。翻成面面心。自從遭點污。拋擲到如今。攷元人關漢卿雜劇。載錢可謝天香事。亦有之。謝云。一把低微骨。置君掌握中。料應嫌點澆。拋擲任東風。錢云。爲伊通四六。聊擎在手中。色緣有深意。誰爲馬牛風。特後人稍易其語耳。

唐崔湜初執政時。年二十七。容止端雅。文詞清麗。嘗暮出端門。下天津橋。馬上吟曰。春還上林苑。花滿洛陽城。張燕公時爲工部尙書。望之杳然而歎曰。此句可效。位可得。其年不可及也。高宗承貞觀之後。天下無事。上官儀獨持國政。嘗凌晨入朝。巡洛水堤步月。徐轡咏詩云。脈脈廣川流。驅馬歷長洲。鶻飛山月曉。蟬噪野風秋。羣公望之如神仙云。二相事大相類。一以曉入。一以暮出。俱馬上賦詩。而人羨之。余鄉磐谷國初有周所立先生者。善口辯。能詩文。跡弛不羈。今所傳僞漢上梁文。其手筆也。時有定住字。

子靜者爲陳友諒守臨江。與周詞賦往還頗密。子靜與太祖抗於鄱湖。被殺。周哭之以詩曰。綠劍池頭舊使君。近傳消息不堪聞。的盧竟死檀溪險。鸚鵡翻成鄂土墳。蒿葉蕭條生夜月。棠陰迢遞起秋雲。陳琳老大頭如雪。無復軍前草檄文。清江重鎮牧旌麾。常憶蒸鵝餅餠時。文采風流三國士。才情禮麗六朝詩。石龍割起波濤變。金鳳翻從澤國辭。千載羊公遺愛在。行人揮淚峴山碑。至洪武中。以臨江十才子同梁石門寅張司成美和黃體方徵入京。練中丞子甯以其人輕脫。僅得臨江教授以歸。其子以麟經中鄉試。仕止縣令。先生扁其門曰。皓首窮經。郡祭酒馳四方之翰墨。青雲接武。邑大夫化百里之絃歌。黃體方亦予近鄉人。仕止王官。詩效李青蓮。亦俊爽可喜。余僅見其古風一篇。二公家世微矣。集皆散落。志亦無及之者。良可痛哉。

孫典籍蕢。五羊人。有詩名。今廣中刻五先生集。孫其一也。高皇時。坐藍玉事死。臨刑口占一絕云。鼙鼓三聲急。西山日又斜。黃泉無客店。今夜宿誰家。高皇得詩。怒監斬者。不以聞。因并殺之。雙槐歲抄載朝雲集句數十首。殊膾炙人口。乃以註誤不得其死。惜哉。

臨川聶大年。爲仁和學諭。后以修史召至京卒。其詩在國初頗爲人傳誦。有辭四省校文詩云。名藩較藝遣徵書。使者頻煩走傳車。老大難過太行路。平生厭食武昌魚。五羊城古仙游遠。八桂林寒木葉疏。寄語青雲舊知己。莫因辭賦薦相如。

國初王孟端。以墨竹擅名。雅善書。能以篆隸筆法作松檜奇石。詩尤有致。得風人體。有同舍友旅中娶妾。

孟端贈詩云。金猊香冷酒初醒。銀燭光殘月正明。今夜情懷非別夜。有人低語喚卿卿。又云。新花枝勝舊花枝。從此無心念別離。肯信秦淮今夜月。有人相對數歸期。友人得詩不勝感慨。卽日東歸。孟端二詩。賢於諄諄勸諭者百相倍矣。

鄒瑾一名公瑾。吉安永豐人。常遊成都。建文二年。爲大理寺丞。靖難後不屈死。今重慶崇因寺僧續燈方丈。有草書詩一幅云。黃金甲脊三千丈。乘雲直上九天上。胸中有雨濟八荒。四海蒼生皆仰望。末題重慶鄒公瑾咏龍之作。今四川志作江津人。不知孰是。以詩題證之。似爲蜀人矣。然不知永豐家世何如。胡子昭大足人。以榮縣訓導陞翰林檢討。歷刑部左侍郎。建文元年充纂修官。靖難初。與方孝孺不屈死。臨刑有詩云。兩閒正氣歸泉壤。一點丹心在帝鄉。弟子義膺薦任威遠訓導。歷山東僉事。聞兄死。棄官隱丹稜民家。蜀獻王知而憐之。命祝髮爲僧。子義以父母遺體辭。子義有子二。各年數歲。歎曰。嗟乎。吾兄無後。天不絕胡氏。二子當免於難。竟棄去。不知所終。有懷鄉詩云。一區廢宅棠山下。半畝芳塘夕照中。鄉國匪遙身自遠。乾坤雖大足難容。

練中丞死於靖難。文皇怒其不屈。誅及十族。余先族祖及先宜人吳氏祖。俱以詩朋譎戍。其他以片紙隻字株連者餘幾千家。練有一妾一女。靖難前俱留滄。後就先生金陵。先生一見輒泣下不止。蓋知二人者不能死也。先生死。俱發浣衣局。仁皇帝時。女得歸。嫁東坊陳氏。今滄有練小戶云。練之先。由三洲居城東坊。爲東坊民。而祖籍尙有人。靖難時或死或竄。俱無存者。今三洲有村農姓練氏。蓋遠孫也。羅太

史洪先過三洲訊之。因哭以詩曰。三洲烟草暮江濱。未問遺墟淚下頻。破冢有山歸別主。遠孫無食寄貧鄰。百年天地誰非幻。千古綱常獨在身。莫爲英雄倍惆悵。天涯多少未歸人。

陳尙書汝言。潼關人。天順初。以奪門功。至兵部尙書。後竟坐石亨黨敗。然其詩亦清麗可誦。秋夜云。喔喔荒雞唱五更。起瞻北極大星明。佳人搗練秋如水。壯士吹笳月滿城。江海久慙生計拙。干戈深動故園情。尺書望斷南來鴈。惆悵空令涕淚零。余入關。意家必有集存。訪之。後人微甚矣。關志僅載汝言資敏家貧嗜學不倦。時衛未有學。乃遊荆蜀。訪聞人學。學成歸。客寓西安。有某公者。每夜聞讀書聲不輟。問之。因閱所業。乃爲占籍長安。遂魁戊午鄉薦。壬戌登劉儼榜進士。潼士選舉。蓋陳爲首云。

給諫李宗一名元祥。符人。而獻吉業師也。獻吉年十四。隨其父教授公寓汴。從宗一學毛詩。不數年。宗一以解元登第爲夕郎。獻吉亦以解元登第爲戶部主政。同立於朝。每相倡和。宗一有詩得能字。獻吉和之云。奉和高韻兼申賀忱。春風白髮拜新陞。舊署重來有夢曾。官暇更饒詩酒興。病餘甘遜簿書能。吏人掃閣將移竹。賓客臨軒或遇僧。他日門牆三鱣在。媿從雲路接飛騰。集偶不載。惟時王伯安爲主政。與獻吉莫逆。併善宗一。亦和之云。懶愛官閒不計陞。解嘲還計昔人曾。沈迷薄領今應免。料理詩篇老更能。未許少陵誇吏隱。真同摩詰作禪僧。龍淵且復三冬蟄。鵬翼終當萬里騰。獻吉又和宗一韻云。奉次高韻。語意縱放。伏惟恕而進之。坐便涼爽入西齋。天末黃雲送晚霾。蠅虎技微空守戶。葡萄陰重欲翻階。瘦餘子夏非關病。醉後陽城不爲懷。古往今來共回首。世人猶自巧安排。以上三詩皆和韻。或謂

唐人早朝詩篇止和其意。近世和韻非唐人指。然李王二公與關中王允甯。往往和韻。亦未爲不可也。宗一先名源。後易元。平臺其別號也。

東里楊文貞公士奇。洪武中被薦教授職。未幾以失事去官。更姓名曰易大可。游湘鄂間。嘗題詩黃鶴樓。曰黃鶴西飛竟不回。青山樓閣自崔嵬。昔年賣酒人何在。今日題詩客又來。舟繫城邊官柳長。笛吹江上野梅開。不堪回首東歸去。目斷長安一鴈哀。又先生少日卽事賦詩云。霏雪初停酒未消。溪山深處踏瓊瑤。不嫌寒氣侵人骨。貪看梅花過野橋。爲劉伯川所器。此二詩也。一則當流離之際而瀟灑自如。一則處寒沍之時而興致不改。出而當天下事。其堅定凝重。以致君澤民。不爲是非利害所搖奪。三朝相業。有光昭代。豈偶然而已哉。

李獻吉先生始祖曰貞義公。名思。故扶溝人。贅於邑人王聚。當成慶陽。貞義公代往。遂冒王姓者三世。獻吉父惟中。名正。以歲貢起家。始復李姓。爲周藩封邱王教授。獻吉年十四。隨入汴。尋入爲扶庠生。宏治壬子。將應河南鄉試。汴人謂獻吉聖童。試必發解。將阻抑之。遂日夜兼程如慶陽。督學遂菴楊公。一試輒許發解。旣而果然。明年登進士第。正德丁卯。爲戶部員外郎。大司徒韓公文等論逆瑾罪惡。瑾知疏出獻吉。遂歸汴。明年戊辰三月。移家扶溝。其飲張氏芳園會諸君子詩云。三月到扶亭。扶亭春正好。綠水帶烟城。林花白皓皓。况與會心人。銜杯坐芳草。微言時剖析。幽意恣探討。風來落英滿。醉臥不須掃。再遊張氏園云。莫道園林春事稀。重來尙見一花飛。葉心梅實垂垂結。樹底山蜂款款歸。百罰酒杯

真不厭。故鄉風景舊多遠。濁河清濟天波遠。更上高城眺落暉。寓扶亭云。霜落扶亭已暮秋。遠人翻作故園遊。天低曠遠沙扶樹。月澗高城水近樓。千里關河今一到。百年桑梓竟何求。畫堂銀燭親朋酒。車馬何妨數日留。以上三詩。集偶失載。緣宅基未愜初意。其臘日詩有腐儒奔走竟何事。鄉土栖遲多苦心之句。意可知矣。詩所謂親朋者。諸生李佩德與焉。佩德名瑤。身長九尺餘。賦性樸直。聲響如鐘。居密邇獻吉。朝夕與晤。獻吉每語人曰。吾鄉李生佩德。貌與性行。皆似古人。今世不多觀也。其爲佩德爲鄭王相卒誌銘。出工部主政李伯材手。伯材名技。獻吉冢嗣。嘉靖癸未進士也。伯材第四子名四維。以鄉貢士爲沔陽守。邑李伯實與善。爲題公舊宅云。曾聞汴上抱離憂。一日移家曲洧遊。避地不妨辭竹苑。還鄉自合老桐邱。年深楊子元亭在。壁故江淹綵筆留。况有成書傳海內。每從詞客話風流。宅今屬曹氏。知者咸指爲空同宅云。

王中丞元美。名在海內。稱七子。又其最稱李王。謂于鱗與公。視宏正閒獻吉仲默也。今士大夫交口傳誦其詩篇。如靈蛇夜光。洋溢中外。李金集已刻。中丞公有弇州山人四部集。刻而不欲傳。故人鮮盡識。公生平推李甚至。故名稍抑在下。今觀其詩。視于鱗誠伯仲之間。文之高下。雖非小生淺學所能窺。然合而觀之。則李云擬議以成其變化者。雖自負稍高人。亦不易及。第論其至擬議之功。李差盡矣。究其變化。似猶局促在繩墨中。若信意所適。隨物而施。不失往程。不滯舊迹。滔滔莽莽。愈達而愈神。紛紛紜紜。愈變而愈妙。則公之文。當爲明興獨步。卽獻吉贈送諸篇。尙瞠乎後矣。其詩爲于鱗所選。似止一時贈

答亦尙未盡。余嘗愛其聞警二首云。春雪輕寒草未長。北風吹日晝倉皇。羽書實報臨三輔。貂綺虛傳出尙方。愁見材官投灞上。喜聞飛將下漁陽。請纓投筆憑誰寄。老婦孤兒更可傷。黃雲白草漢關頭。豹虎荒村總百憂。永夜茅堂看斗柄。中天畫角起邊愁。龍驤候月三千騎。鴈塞橫空百二州。最是聖明惟薄伐。玉門何地覓封侯。夏日同僚友。崔都尉山莊分韻云。別館橫臨鄠杜邊。偶逢三伏勝遊偏。夾堤楊柳涼全得。出水芙蓉曉故鮮。北極雲霞供檻外。西山風雨落尊前。誰家暗度秦臺引。回首朱門月可憐。卽此三詩。置之老杜盛唐。誰復辨者。况其未見故多也。公自云。吾於詩文。不作專家。亦不雜調。夫意在筆先。筆隨意到。法不累氣。才不累法。有境必窮。有證必切。敢於數子。云有微長。公之所自負如此。蓋大而非誇矣。至明興博雅。必稱楊修。譔用修。今丹鉛所錄。公復爲正數條。尺牘所遺。公又爲補數卷。若公扈言別錄。如入海藏龍宮。無所不有。蓋非僅止於博古。而又於當今典章文物。考索評訂。汪洋浩博。精擇朗識。實足以垂後來。照當世。張中丞肖甫嘗謂余云。與公居常談笑吟諷外。或酣酌竟日。達旦。似無一刻事佔畢者。不知公書從何所得。從何時讀也。茲真有天授哉。

扶溝李時芳伯實。以萬歷壬午貢入京師。八月。應順天鄉試。不售。九月。給諫王公使高麗。要與俱往。伯實難之。王謂伯實平生欲遊五岳。追向平之蹤。東夷九種。宣聖欲居。茲九夷併於高麗。可毋先五岳遊耶。况葱山泚水之勝。密邇海島。殊庭過之。庶幾與烟客遇。而箕子化俗八條。至今遵奉不衰。稱爲東藩。試往而觀其遺風。亦奇遊也。奚難之爲。伯實遂飄然偕往。盡覽海國諸勝。其國王姓李名松。務學而雅重。

文墨。既徵伯實詩歌草書。一日命禮曹判書李珥者。謁伯實。問中國文人。宏正閒有李獻吉何仲默二氏。東藩嘗購求其書傳境內矣。不知近世繼二氏者幾人。有成書行世者幾人。伯實答明與諸名家不可勝數。嘉靖隆萬以來。其最著者。山東則李于鱗。南京則王元美。敬美。汪伯玉。江西則余德甫。朱秉器。陝西則王允甯。浙江則徐子與。湖廣則吳明卿。李本甯。四川則張肖甫。楊用修。河南則張助甫。劉致和。山西則王明輔。北畿則穆敬甫。皆接跡李何。巍然文名當代。有集行世。偶未全挈。獨元美四部集與敬美詩數十首在耳。次日復命珥求去。遂以李杜二全集訓之。珥復斂容謂漢有兩司馬。班揚而唐惟李杜韓柳。宋稱歐蘇二氏。合漢唐宋不越數人。而皇明自李何後。統之亡慮數十人。以一時而倍前數代。皇明其千古絕勝哉。伯實以爲知言。迨冬未還。會助甫以晉憲入覲。聞伯實來自異國。復見其詩。遂爲詩書扇頭以贈曰。天涯芳草徧春原。客裏逢君與晤言。渡海探奇箕子國。遊梁授簡孝王園。林閒片月開青嶂。雪後輕寒逗綠尊。自是賦成應有薦。抱關甯復老夷門。黃太史魏侍御覽之。皆曰。箕子國。孝王園。千古的對待。助甫用耳。逾年。敬美聞之以書報伯實。足下以一書生遊異國。而囊中能貯王元美四部集。腹中能貯其弟百篇詩。使鴨綠江外人。傳誦天朝有二王生。卽恐長慶白公。未獲此奇觀。家兄自可耳。僕何人斯。而厚幸至此云云。伯實獨恨未挈于鱗諸公集。負東藩輔耳。

升菴楊先生夫人黃氏。遂甯黃簡肅公女。博通經史。能詩文。善書札。嫻於女道。性復嚴整。閨門肅然。雖先生亦敬憚之。嘗見先生從子大行有仁云。夫人雖能詩。然不輕作。亦不作藁。卽子姪輩不得而見也。今

海內所傳。若鴈飛會不到炎方。及懶把音書寄日邊。久爲人傳誦。簡西巒又記一詩云。纔經賞月時。又度菊花期。歲月東流水。人生遠別離。只二十字。而感時傷別。不必斷腸墮淚。而聞者淒然不堪。殆絕唱也。國雅又記一詩云。螻螳也知春色好。倒拖花瓣上東牆。則諸書所記不一。且聲調與夫人百相遠矣。邑人黃渠。字體方。在國初以十才子徵。後爲周王府伴讀。余求其集不得。所著有詩海珊瑚。其自序云。僕學詩數十年。讀詩數萬篇。求其渾然天成之句。於百中得一二。錄爲一帙。命曰詩海珊瑚。蓋所選皆五七言佳聯。而附以己作。其五言云。風月雙清夜。乾坤萬里秋。八極風爲馬。三山月釣鼈。盤石中流坐。青山隔岸看。對此十分月。能消千古愁。水天同一色。風月自雙清。雲生雙澗口。人坐兩松閒。移舟秋水渡。載酒夕陽亭。玉宇秋無際。瑤臺月正明。滕王閣云。江湖襟帶外。棟宇斗牛邊。學士竹云。玉堂揮翰手。滄海釣鯨竿。七言有小序云。東坡志林云。七言之偉麗者。杜子美旌旗日暖龍蛇動。宮殿風微燕雀高。五更鼓角聲悲壯。三峽星河影動搖。爾後寂寞無聞焉。直至歐陽永叔云。滄波萬里流不盡。白鳥雙飛意自閒。萬馬不嘶聽號令。諸番無事樂耕耘。可以竝驅爭先矣。小生亦云。令嚴鐘鼓三更月。夜宿貔貅萬竈煙。又云。露布朝馳玉關塞。捷書夜報甘泉宮。亦庶幾焉爾。僕非敢追蹤前賢。於千百首中。亦有數聯。不揣鄙陋。輒敢效顰於後云。遠遊詩興云。帝子假臣閒。日月天公助。我好江山揚。子江云。羣江只似三千客。一水過如百萬兵。長江云。東南形勝包中國。多少英雄據上游。扁舟一日馳千里。兩岸青山過萬重。閩中云。千里溪山無限景。四時花木一般春。太湖云。白晝風雲連海起。青山烟雨使人愁。赤壁云。兩

篇詞賦千年在。三國英雄一戰休。隆中云。當時鼎足三分國。定策茅廬數語中。中秋云。人在山河秋影裏。酒斟天地玉壺中。蘭亭帖云。盛事一觴還一詠。名書千古重千金。蘭亭圖云。一時人物風流甚。千載斯文感慨多。孟浩然像云。鹿門歸去人如玉。驢背吟成骨已仙。大風云。一天雲霧多吹盡。半夜星河影動搖。寄玉堂故人云。三年共作京華客。五夜曾隨劍珮聲。送人致仕云。三逕水邊松菊在。一人林下布衣閒。邯鄲云。三千食客侯門下。一枕黃粱旅夢閒。寄僧云。茶瓜留客竹深處。竿木隨身雲半閒。燕子云。去來不見春秋社。新舊幾經王謝家。三山客況云。身似無官爲客久。秋來有月與誰看。送弟云。鄉思共隨雲北起。客心忍看鴈南飛。雪云。玉宇瓊樓原不夜。琪花瑤草總無香。餘無題云。玉階鵲序聯班定。金闕龍庭進表來。野田青處麥千頃。楊柳綠邊人幾家。雲淡日昏晴雨景。今來古往短長亭。清曉喜聞鸚鵡語。殘春留得牡丹看。夜來春雨滿山谷。曉起白雲翻海濤。風急數聲聞遠笛。月明何處搗寒衣。幾處佳人看北斗。誰家長笛怨西風。山頭一夕風雨過。門外雙溪春水生。疏疏密密雨纔過。白白紅紅花亂開。風送花香留客座。月移樹影過牆來。半夜雨聲殘暑退。一天秋色晚涼新。野橋流水三叉路。茅屋人家獨樹村。行看野岸數楊柳。驚起沙洲雙駕鵝。江上故園頻入夢。天涯芳草未歸人。百年爲客雙蓬鬢。千里思親寸草心。秋風匹馬黃華路。落日孤雲白鴈天。去帆離汴麥秋晚。行李到江梅雨時。楊柳春風千里馬。蓬萊宮闕九重城。離筵九日黃花酒。行李千金紫綺裘。杏花雨中頻過我。椿樹屋下時論文。細觀其中頗有得失。然不失其爲工也。余曩曾見其送周墮長歌。酷似太白。今藁不存矣。惜夫。

司禮張君名維，薊人也。少侍今上春宮，爲予言上初學詩，咏新月云：天邊一輪月，其形光皎潔，可比聖人心。乾坤多照徹，帝王氣象，宛然二十字中，信天縱之聖也，豈尋常可望哉。



編主五雲王

編初成集書叢

談 詩 笥 玉
續 正

中華民國二十五年十二月初版

著 者 朱 孟 震

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

◆ D 七 二 九

徐



83

14

:2586